



咸賓錄東夷志卷之二

明豫章羅曰璣尙之父著

朝鮮

朝鮮東夷大國也昔堯命羲仲宅嵎夷曰暘谷孔子欲居九夷夏后相時於夷來賓少康時方夷來賓及周公所滅淮夷大抵皆東夷種也武王伐紂釋箕子囚箕子既陳洪範義不臣周而武王亦不欲臣之也故封之於朝鮮其初國俗未聞及箕子教以禮義田蠶又制八條之約故其風淳厚與三方異至有邑無淫盜門不夜扃者傳四十餘世至朝鮮侯準稱王漢

初大亂燕人衛滿避地朝鮮遂擊破準而自稱朝鮮王會孝惠高后時遼東太守奏約滿爲外臣保塞外蠻夷許之滿遂得以兵威財物侵旁小邑凡穢貊高句驪沃沮真番辰國皆服屬焉傳子至孫右渠負固不服又雍闕他國來朝者元封初襲殺漢使涉何漢於是遣楊僕荀彘誅右渠以兩將不相能故久無功頃之尼谿相參廼使人殺右渠來降先是穢君南閭等二十八萬口降置蒼海郡及定朝鮮復置爲真番臨屯樂浪玄菟四郡而以高句驪沃沮爲縣至昭帝時罷臨屯真番二郡而并於樂浪玄菟焉高句驪者

其先夫餘種也夫餘嘗得河伯女因閉於室爲日影所照遂孕生一卵大如五升破而得一男焉及長字之曰朱蒙其俚言朱蒙者善射也王令養馬蒙私以馬駿者減食令瘦駑者善養令肥王以肥者自乘瘦者給朱蒙王狩給朱蒙一矢殪獸甚多夫餘王謀殺之朱蒙遂棄其母與馬達等二人東遇河難濟追者又迫朱蒙曰我日之子河伯外孫也今奈何俄而魚鼈成橋朱蒙得渡魚鼈乃解朱蒙遂至普述水遇見三人一着麻衣一着衲衣一着水藻與朱蒙至訖升骨城遂居焉號曰高句驪因以高爲氏朱蒙死子如

栗立如栗死子莫來立其人性凶急習戰鬥好寇鈔
沃沮東濊皆屬焉武昭雖置爲縣後稍驕不服王莽
初發句驪兵伐胡不行郡縣強迫之遂亡出塞莽令
嚴尤誘句驪侯騶斬之傳首長安於是寇邊愈甚及
光武興罷兩郡都尉官仍以穢及沃沮地封其渠帥
爲侯而遼東太守祭彤威信素著於是高句驪濊貊
倭韓夫餘諸國來獻倭卽日本詳見日本志中韓有
三種曰馬韓國五十四曰辰韓國十二曰弁辰國亦
十二合方四千餘里皆古之辰國也馬韓最大其諸
國王盡馬韓種人俱服屬焉昔朝鮮王準爲衛滿所
破遂將餘衆千人攻入馬韓爲王準後卒韓人復自
立辰韓耆老自言秦之亡人避苦役適韓相呼有似
秦語風俗尙禮勝於馬韓弁辰國近倭故頗有文身
者三韓自漢晉以來朝貢不絕後爲新羅百濟所併
夫餘東明之裔也其事與朱蒙同漢晉以來朝貢及
阿保機滅夫餘改東丹府遂絕後高句驪王宮勇壯
數犯邊境元興初寇遼東耿夔擊破之元初建光時
輒與濊貊馬韓鮮卑人入寇圍玄菟城殺掠吏人時
遼東太守蔡諷戰沒官屬并軍卒死者數千人夫餘
王乃遣子尉仇台將兵來援與州郡并力討破之是

歲宮歿子遂成立詣玄菟降遂成歿子伯固立其後
 歲貊率服東垂稍安及桓靈失政復入寇掠玄菟太
 守耿臨討之伯固降乞屬玄菟云伯固卒子伊夷模
 立建安中公孫度擊破之有其國伊夷模更作新國
 於丸都山下居焉伊夷模歿子位宮立
一名宮慕祖風烈故襲其
 名有勇力便鞍馬善獵射從晉擊公孫氏有功勢遂
 滋盛魏正始初寇遼西安平幽州刺史毋丘儉往擊
 之位宮敗走儉使王頎追之絕沃沮千餘里到肅慎
 南刻石紀功而還是時頎問其耆老海東復有人不
 耆老言國人嘗乘船捕魚遭風至一島語言不相曉

俗常以七月取童女沈海又一國在海中純女無男
 撒地而孕胷前無乳項後生毛中有汁乳于百日能
 行三四年則成人矣又海岸邊有兩面人項中復有
 面生得之與語不通不食而歿又得一布衣從海中
 而出身如中國人衣其兩袖長三丈蓋沃沮東界之
 極也晉時立宮五葉孫釗為王慕容皝擊破之掠萬
 餘口焚其宮毀丸都城而釗亦尋為百濟所殺於是
 遂徙都平壤平壤即樂浪也
元東寧路今仍屬朝鮮
 及慕容寶
 以句麗王安為平州牧封遼東帶方二國遂略有遼
 東郡勢復振立至晉安時安孫高璉獻赭白馬晉封

爲高麗王樂浪郡公璉壽百有餘歲而歿凡四傳而湯立自東晉宋至於齊梁後魏後周其主皆受南北兩朝封爵分遣貢使隋時其國漸大及隋平陳湯懼陳兵積穀爲守拒之策高祖曉諭之遂上表謝罪湯卒于元立元率靺鞨兵寇遼西旣而煬帝徵元入朝元不至煬帝大怒遂親征之高麗嬰城固守隋食盡師老轉輸不給諸軍多敗績乃班師還頃之高麗亦困弊遣使乞降隋末天下喪亂仍徵元入朝元竟不至也元歿于建武嗣唐高祖初兩遣使入朝唐拜建武爲上柱國封高麗王頃之新羅百濟上書言建武閉道使不得朝且數侵入詔使朱子奢持節諭和是時太宗已擒頡利建武懼請與二國平且賀滅突厥并上封域圖久之復遣太子桓權入朝獻方物帝厚賜賚詔使者陳大德持節答勞且觀釁大德入其國厚餉官守悉得其纖曲大德還報太宗大喜於是遂有征服高麗志矣高麗有益蘇文者姓泉氏自云生水中以惑衆性忍暴嗣父爲東部大人殘凶不道諸大臣與建武議誅之蓋蘇文覺悉召諸部詒云大閱兵列饌具請大臣臨視賓至盡殺之凡百餘人馳入宮殺建武殘其尸投諸溝更立建武弟之子藏爲王

自爲莫離支專國柄猶唐兵部尙書中書令職二太
宗聞建武爲下所殺遣使弔祭不欲因喪伐罪乃拜
藏爲高麗王會新羅遣使者上書言高麗百濟來攻
請天子哀憐太宗以書讓高麗且使止勿攻使未至
而蓋蘇文已取新羅二城矣會李勣勸上討之帝意
遂決乃遣將張亮李勣李道宗契苾何力等二十人
往征之又發契丹奚新羅百濟諸君長兵悉來會上
次定州坐城門過兵人人慰撫疾病者親視之敕州
縣治療士卒大悅人人願爭先赴敵矣於是勣攻牟
城拔之以其地爲蓋州孫伐音攻白崖城拔之以其
地爲巖州勣遂圍遼東城帝至城見士卒填塹分負
之重者馬上持之羣臣震懼爭挾硯以進帝與勣會
甲光炫日會南風急士縱火焚西南燔延城中屋幾
盡人死於燎者萬餘衆登陴虜蒙盾以拒士卒長矛
舂之闐石如雨城遂潰以其地爲遼州遂引軍次安
市城進兵攻之會高麗南北部僣薩高延壽高惠真
率靺鞨之衆十五萬來援於安市城東南八里依山
爲陣上令所司張受降幕於朝堂之側夜召文武躬
自指麾是夜有流星墜賊營中明日及戰大破之延
壽惠真降上悉以其酋長授以戎秩命還以平壤靺

鞞三千人竝坑之所獲無算因名所幸山爲駐鞞山
命許敬宗爲文勒石紀功焉太宗崩高宗立藏遣使
者奉慰後新羅訐高麗靺鞞奪三十六城詔程名振
等率師討擊勝之無何蓋蘇文歿于男生代爲莫離
支與弟男建男產相怨男生入朝求援而蓋蘇文弟
淨土亦請割地降乃詔遣將契苾何力薛仁貴龐同
等討之皆受李勣節度會侍御史賈言忠計事還帝
問軍中云何言忠對曰必克高麗秘記曰不及九百
年當有八十大將滅之高氏自漢有國今九百年勣
年八十矣虜仍薦饑人相掠賣地震裂狼狽入城蚡
穴於門人心危駭是行不再舉矣未幾勣圍平壤藏
遣男產率首領百人樹素幡降且請入朝勣以禮見
而男建猶固守出戰數北大將浮屠信誠遣謀約內
應遂入火其門執藏男建等收凡五部百七十六城
戶六十九萬詔勣便道獻俘昭陵凱而還勣等數俘
於庭高宗赦之各授以職諸將加爵有差剖其地爲
都督府九州四十二縣百復置安東都護府擢酋豪
有功者爲都督刺史而以薛仁貴爲都督總兵鎮之
藏以永淳初歿葬頡利墓左由是高氏絕王矣至垂
拱中以藏孫寶元爲朝鮮郡王唐末中原多事遂自

立爲君長而其名號史失不紀矣至後唐明宗時權
知國事王建承高氏之位并有新羅百濟以平壤爲
西京遣使朝貢封爲高麗國王建卒子武立武卒子
昭立王氏三世終五代常來朝貢其立也必請命中
國中國常優答之周世宗時王昭進別敘孝經一卷
越王新義八卷皇靈孝經一卷孝經雌圖一卷別敘
者敘孔子所生及弟子從學之事新義者以越王爲
問目皇靈述延年辟穀雌圖載日食星變皆不經之
說宋太祖建隆初昭遣使朝貢昭卒子佑立佑卒弟
治立先高麗遣國人金行成崔罕王彬等詣業國學
後俱登第於是朝貢不絕請命受封如常無何遣使
言契丹寇境宋以夷狄相攻圍其常不可輕動干戈
爲國生事使還自是受制於契丹朝獻中絕矣治卒
弟誦立誦卒弟詢立會契丹攻陷高麗六城詢徙居
避之尋結女真設奇邀擊殺戮契丹殆盡勢稍得振
於是復入貢焉因言爲契丹羈制之狀宋厚答之詔
登州置館於海次以待使者詢卒其後不通中國者
四十餘年至詢孫徽立輒遣使入貢表求醫藥畫愬
之工詔募願行者往高麗俗病不服藥惟呪咀厭勝
故不知醫自徽來請醫後始有通其術者宋以其國

尚文每賜書詔必選詞臣著撰所遣使者必召赴中書試以文乃往而高麗之待中國使者亦甚恭謹云徽在位三十八年而卒治尚仁恕稱爲東夷良主然猶循其俗王女不下嫁臣庶必歸之兄弟宗族貴臣亦然次子運諫以爲旣通上國宜革故習不從及運嗣遂稍稍變其夷風矣運仁賢好文每賈客市書至則潔服焚香對之貢使至輒市太平御覽文苑英華并諸書甚衆運卒凡四傳而楷立貢使接踵賞賜不貲而郡縣供頓擾民殊甚蘇軾謂高麗入貢無絲毫利而有五害旨哉言也高麗自王徽以降雖累年通使於宋然受契丹封冊奉其正朔上朝廷及它文書蓋有稱甲子者歲貢契丹至於六而誅求不已常云高麗乃我奴耳南朝何以厚待之使至其國尤倨纍館伴及公卿小失意輒行棗筆我使至必假他事來覘分取賜物云初女直奴事高麗及其強也高麗反臣事之高宗卽位初卽遣胡蠡等往使高麗宋蓋恐其通金人而金亦以是時遣王樞持冊往高麗則亦憂其爲我用也蠡回復募能使絕域者而楊應忱奉詔請行上言由高麗至女真路甚徑請身使三韓結雞林以圖迎二聖詔可遂由杭州浮海行三月抵高

麗諭其王楷以往女真意楷有難色遣其臣具言金人見造舟將往二浙若引使者至其國異時欲假道至浙何以答之高麗之辭果如宋臣翟汝文所料者應忱留兩月餘楷終不奉詔不得已受其拜表而回自三韓發舟凡六日至明州蓋遇順颶故歷險如夷云後高麗亦輒遣使入貢然勢逼於金其奉中國不及元豐以前時矣及元初契丹人六哥等領衆九萬餘竄入其國元太祖遣哈只吉剌刺等領兵征之高麗王名缺奉牛酒出迎且遣其將趙仲共討滅六哥名缺刺與仲結爲兄弟仲請歲輸貢賦自是後元每遣使

趣其入貢而後進方物焉元太宗時征高麗復遣阿兒禿與高麗降人洪福源招其主王瞰瞰遣其弟王倏請和許之置京府縣以達魯花赤七十二人監之遂班師頃之瞰盡殺元所置達魯花赤七十二人以叛尋率衆竄居海島元遣將命福源領其衆瞰復攻之福源遂遷居東京而元賜佩金符命同將唐古攻瞰瞰於是畏威獻琛矣至乎憲定之間歲貢不入元凡四命將征之瞰遣世子植入朝瞰卒元命植歸國嗣王兵衛送之植以元冊封故終世祖之三十二年其國入貢者凡三十有六焉是時元欲通日本以

高麗與日本鄰可爲鄉導乃遣兵侍黑的等使日本
先至高麗諭旨植遣使導往日本不至而還元與高
麗從此隙矣而其歲貢如故也後植世子憐入朝奏
言本國邪臣林衍廢植立曄之事元大怒發兵征之
而復王植故位詔西京內屬改爲東寧府植歿子憐
立後更名昀以尚元公主故賜以駙馬高麗王印而
加號特進上柱國開府儀同三司征東行中省左丞
相駙馬高麗王云成宗時哈散使高麗還言昀不能
服其衆宜遣官共理之遂復立征東行省命闊里吉
憇爲高麗行省平章政事未幾復罷而奉命滋謹矣
昀卒凡三傳而王暲嗣王氏自建立國至暲凡二十
八王歷四百餘年云 我朝洪武二年王王顥表賀
卽位遣符寶郎侯斯賜金印誥命大統曆金綺封爲
高麗國王并賜王母妃相國諸陪臣文幣有差仍以
祝文牲帛祭高麗境內山川云未幾復遣陪臣金柱
來朝柱頗知書出清宴閣讌記自言其人世祖金緣
所作乃宋徽宗讌蔡京事不知蔡京爲中國所鄙云
五年王顥遣其禮尚吳季南等貢方物表言暹羅國
恃其險遠不奉朝貢蒙古人畱居其國宜徙之蘭秀
山遁逃所聚亦恐爲寇患乞發兵討之 上賜璽書

言暹羅隸爾國蒙古亦人類蘭秀山逋寇示以朕詔
一呼可至勿用兵便十年以高麗貢使煩數遣故元
樞密使延安答里諭意顓遣使姜仁裕表謝貢方物
十七年 上因高麗使來不遵臣禮以賄結逆臣胡
惟庸事覺遣其使還以勅諭遼東守將唐勝宗葉昇
令絕高麗未幾高麗果遣使至勝宗昇以聞 上復
以勅褒獎之二十年遼東守將濮真以高麗叛服不
常引兵攻之兵敗被執自刺死顓懼上表請罪歸真
喪顓卒封禡爲高麗王非顓親子國人所共立也二
十二年指揮高家奴等市馬高麗還言高麗王禡表
請不受馬直 上令擇可用者以直償之餘駑弱者
量減其直仍勅高麗還遼陽瀋城民昔避亂於其國
者禡遂遣使以遼瀋流民奈朶里不歹等戶四十五
口三百五十人來歸頃之國相李仁人廢禡而立王
昌仁人子成桂復廢昌而立王瑤久之竟廢瑤而自
立也王氏自五代至今數百傳而始絕成桂遣人請
命 上以其遠夷故置不問成桂更名曰徙居漢城
遣使請更國號詔更號朝鮮且遣使請印誥 上覽
表怪曰不遜詰使者使者言表鄭集撰 上盡却方
物索集曰懼送集至京安置雲南自是遂令遼東絕

高麗矣永樂初旦請老子芳遠嗣聞朝廷欲廣屯田於遼東遣使貢牛萬頭於遼東命戶部每牛一頭酬絹一疋布四疋賜其王文綺表裏各百疋仍勅以其牛分給屯田芳遠卒子禔嗣遣使貢海東青詔諭禔珍禽異獸非朕欲也其勿獻以後聖旦元旦及請封慶弔使來無常期而朝廷有大政頒詔其國及王嗣封亦皆遣使馬至嘉靖中王李峘疏乞改大明會典中所載成桂篡逆事從之其地東西相距二千里南北四千里分八道統府州郡縣俗崇釋尚鬼惡殺戴折風巾服大袖衫男女相悅為婚久三年始葬親不

視殮病不服藥好祀鬼神修宮室飲食用俎豆官吏

閒威儀以田制俸以秬醞酒法無苛條刑不慘毒其

譯語天為哈嫩二地為大日為害月為得其山川古

蹟則丸都山伊夷模建都於此神嵩山王建都於此北嶽山李旦依此

山為都蓋馬大山即古東沃鴨綠江源出靺鞨之長白山色如鴨頭綠故

名潤三百步大通江即淇水也為大其產則白唾紙狼尾筆海

豹皮稍魚昆布蒲花席草性柔折屈不損摺扇以竹多為貴黃漆

漆物如金果下馬高三尺長尾雞尾長三尺紬苧布黑白二色石燈盞

紅白二色俱他國所無者

論曰朝鮮肇自箕子故稱東方君子之國及衛滿篡

入風稍變矣句驪併之遂益凌夷然性柔謹好文字
至今猶然豈非箕子之遺化耶若漢之右渠晉之高
宮隋之高元唐之蓋蘇文代爲作逆雖窮兵討之猶
未帖然宋名通貢而實奴事契丹元以兵威劫之納
獻請封非其意也至我 聖祖登極未幾王顥奉表
稱臣累葉朝請遂爲定典迺視前代不大相逕廷耶

女直

女直東夷也古肅慎氏在漢爲挹婁在元魏爲勿吉
唐爲黑水靺鞨宋爲女真避契丹主諱更名女直今
因之昔武王克商通道於九夷百蠻使各以其方賄
來貢而無忘職業於是肅慎氏來貢楛矢石弩其長
尺有咫王以分大姬配胡公而封諸陳漢興以後挹
婁臣屬夫餘種類小而強健夫餘責其租賦重以魏
黃初中叛夫餘數伐之弗克也善弓矢便乘船寇盜
鄰國畏之魏末貢楛矢石弩弓甲貂皮之屬晉元成
間通貢頃之復貢於石虎虎問之答曰每候牛馬向
西南臥者三年矣是知有大國所在故來入貢焉至
元魏時有勿吉者凡七部落而黑水部最強卽肅慎
氏也延興以後貢使相尋隋開皇初靺鞨遣使貢獻
文帝因宴勞之使者及其徒起舞曲折多戰鬪狀帝

曰天地間有此物常作用兵意也後煬帝與高麗戰輒敗其渠帥突地稽率其徒從每有戰功隋拜爲光祿大夫居之柳城未幾遜歸唐太宗征高麗靺鞨佐之甚力駐蹕之役高延壽高惠真以衆及靺鞨兵十餘萬來降太宗悉縱之獨坑靺鞨三千人玄宗時其酋倪屬利稽來朝拜爲勃利州刺史遂置黑水府以部長爲都督刺史賜姓李唐置長史監之訖唐世貢使相尋獻物有鯨睛貂鼠白兔石弩楛矢亦奇物也貞元後渤海強盛靺鞨皆役屬之遂不與王會矣渤海者本粟末靺鞨初附高麗高麗滅通天中有舍利乞乞仲象者與靺鞨酋乞四比羽及高麗餘種東在樹壁自固武后詔封比羽許國公仲象震國公俱拒不受唐遣將李楷固斬之時仲象已死其子祚榮因并比羽之衆自號震國王盡得夫餘沃沮并韓朝鮮諸國地嘗通貢唐朝睿宗封爲渤海王自此遂稱渤海國云祚榮死以後叛附無常然數遣諸生詣京師太學習識古今制度故郡邑官號章服多倣中國者至阿保機興數侵擊之勢遂不振後唐時黑水兀兒及胡獨鹿兩部酋長遣使朝貢後不復見而女直之名始通中國云種類不一有生熟女直有黃頭女直

生女直及黃頭女直勢微終未強盛惟熟女直僻處契丹東北隅臣服一百餘年世襲節度使自宋建隆以至天禧貢使不絕契丹怒其朝貢中國遂於海岸置三柵柵置兵三千絕其貢獻之路女直乃汎海入朝求發兵與三十首領共平三柵太宗不爲發兵後契丹征高麗道由女直女直遂與高麗合兵拒之大敗契丹自是女直勢稍振矣相傳宋初有亟普者新羅人也年六十餘別其兄阿古廼而與弟保活里適女直居於完顏部傑幹水之涯久之完顏部人有殺其族人者兩族交鬪衆莫能解亟普乃往諭解之部衆信服謝以青牛一并歸以六十之女亟普以青牛爲聘而納之後生二男長曰烏魯次曰幹魯一女曰恩板其後爲金之始余觀松漠記關所載金人歷代祖無亟普之名第二云完顏氏所妻六十女生二子長曰胡來而宋史所載其酋有龕福者凡五傳而至胡來二說雖異大抵胡來乃阿骨打四世祖也阿骨打之父曰楊割者能用其人強於諸部遼主洪基時識者知其必爲東方之患乃楊割多持金珠駟駿歲時遺賂契丹用事臣如是者十餘年楊割歿子骨打立先是女直歲以海東青貢於契丹契丹酷愛之誅求

不已國人厭苦及遼王延禧嗣位責貢尤苛至遣鷹坊子千餘越長白山羅取歲甚一歲不勝其擾凡銀牌天使至女直必欲薦寢者初輪中下戶室女待之後不論其有夫及閏閏高者於是女直人人有畔志遼俗春冰泮時遼王必至女直地鑿冰釣魚放弋爲樂女直人各以其所產來獻量輕重而打博謂之打女直是時延禧釣魚於混同江凡女直酋長皆來會酒酣命諸酋歌舞爲樂骨打獨端立直視辭以不能延禧欲誅之遼臣蕭奉先諫乃止頃之骨打遂叛以同族粘罕胡捨爲謀主銀木割移烈婁宿闍毋等爲元帥其軍法五十人爲一隊前二十人被重甲持戈矛後三十人輕甲操弓矢每遇敵則兩人躍馬而出觀陣虛實然後四面結陣馳擊百步之外弓矢齊發勝則整陣緩追敗則復聚而不散其分合出入應變周旋人自爲戰時延禧暴虐將士離心又輕女直兵故女直甫起卽五敗契丹師契丹大怒下詔有剪除之語骨打聚衆以刀務面仰天而哭曰契丹欲盡剪除汝輩不如殺我一族而降可轉禍爲福耶諸酋拜曰願以死戰無何破乾顯等州復得遼棄長春兩路始用鐵州降人楊朴議進稱皇帝國號大金以其地

產金故也而追尊龔福以下皆爲帝宋聞女直得遼陽地童貫議欲倚之以復燕詔趙良嗣往聘約夾攻契丹取燕雲骨打許諾遂議歲幣如契丹舊數明年金人取中京至古北口延禧奔雲中居夾山而朔應諸州皆陷金遂入燕會燕王淳已歿妻蕭后遁出奔宰相左企弓等迎降宋命趙良嗣等報聘金人但許燕薊六州而猶欲自取六州租稅良嗣還復往議至再三竟於契丹歲幣外增一百萬緡而求西京明年童貫蔡攸入燕燕之子女玉帛職官富室皆席卷而東所得空城而已骨打歿弟吳乞買立是時中京被圍延禧敗困遂奔西夏夏畏女直之威不敢納又以未幾杖林攄事不敢奔宋遂走小鞠鞞復不納延禧勢窮乃夜回欲之雲中未明遇婁宿軍婁宿下馬捧觴天祚前擒之俘以還封海濱王處之東海上契丹遂亾無何金人入寇取朔武忻代四州遂圍太原明年圍京師宋遣使約割太原中山河間三鎮之地以康王構少宰張邦昌爲質發內帑金帛數萬皆從金人之請也初李綱請伐金欽宗不聽金人銜綱宋遂罷綱以謝金人而金之猖獗自如也無何李綱復用下令能殺敵者厚賞衆無不奮躍金人懼稍稍引却

及欽宗詔往許三鎮地金人退師种師道請乘其半
濟擊之帝不許師道曰異日必爲國患吕好問亦曰
金人得志益輕中國禦敵之備當速講求而帝終弗
聽也未幾金將粘沒喝幹離不分道入寇尋圍京城
宋將郭京范瓊等禦之不能克京城遂陷帝聞城陷
慟哭曰不用种師道言以至於此於是遂遣使割地
矣金復索金帛甚急且邀帝至營帝有難色而何桌
李若水力勸帝行如青城吳乞買得帝降表遂廢帝
及太上皇爲庶人更逼帝及上皇易服若水抱帝而
哭詆罵金人不絕口竟以裂頸斷舌而死議者謂若
水是舉也足以釋其勸帝出城之罪矣項之金人立
張邦昌爲帝而擁二帝及太子后妃宗戚三千人北
去宋臣遂共奉康王卽位而邦昌退位爲太保馬時
陝西山東河南淮陽相繼陷沒而高宗建國臨安雖
有宗澤張浚岳飛諸將勢稍得振久之澤卒浚飛爲
秦檜所排故地於是不復矣及乞買卒凡八傳而守
緒立是時蒙古鐵木真稱帝首謀伐金凡攻城對敵
所向皆克及金奔汴蒙古已取城邑凡八百六十有
二遣使命金去帝號稱河南王彼此罷兵金主不從
蒙古遂決意滅金鐵木真死子窩濶台立金遣使來

歸謂帝曰汝主久不降使先帝老於兵間吾豈能忘也
也謂何爲哉却之敕蒙古民有馬百者輸牝馬一牛
百者輸牯牛一羊百者輸粉羊一爲永制始置倉廩
立驛傳命河北漢人以戶計出賦調耶律楚材王之
西域人以丁計出賦調台沒的滑刺西迷王之遂與
宋合兵擊金金主守緒懼遣使往宋借糧曰唇亡齒
寒我滅勢必及宋矣宋不許時圍城甚急守緒遂傳
位於東面元帥承麟承麟固讓守緒曰我以肌體肥
重不便鞍馬馳突卿平日趨捷有將略萬一得免祚
胤不絕此朕志也承麟因卽帝位百官賀畢亟出捍
敵而南面已立宋幟俄頃四面呼聲動天地守者棄
門元兵入守緒自縊承麟亦爲亂兵所殺金亾而餘
衆得脫者或奔歸女直故地元卽其地設開元路領
咸平府隸遼東宣慰司咸平乃古箕子所封地也

我朝永樂九年遣將駕巨艦至混同江上召集諸酋
豪餌以官賞於是東旺佟等四酋率衆降始設奴兒
千都司以四酋爲都指揮賜勅印又置衛一百八十
四所二十諸小酋爲指揮千百戶鎮撫官令三歲一
貢仍置馬市羈縻之種類不一建州居中最強地最
險虜人視爲咽喉本渤海遺孽喜耕種緝紡飲食衣

服頗有華風其近松花江者曰山夷皆山居卽黃頭
女直又北抵黑龍江曰江夷卽生女直亦有室廬海
西山夷卽熟女直金人之遺種也永樂初專事撫綏
諸夷漸爲邊患一歲間入寇者九十七殺虜吏民十
萬餘正統景泰時附也先入寇勅印盡亾諸子孫不
得請官以舍人入貢賞賜大減以故怨忿思叛成化
二年酋董山遂糾衆入寇我遣趙輔王英等討之山
降送京師誅之稍平未幾諸夷欲報山仇入寇而巡
撫陳鉞欲掩降虜爲功又附汪直開邊隙出塞撲殺
諸夷諸夷益大憤入塞殺掠無算遣馬文升往撫定
之諸酋遂解散直怒誣文升下詔獄謫戍重慶嘉靖
間巡撫於敖減賞賜夷人大恨因數入塞遼東西大
困自是邊衛益嚴稍無虞矣其俗勇悍喜戰鬥耐饑
渴善射騎上下崖壁如飛濟江河不用舟楫浮馬而
渡好畋獵每見野獸之蹤躡而求之能得其潛藏之
所又以樺皮作角吹作呦呦之聲呼麋鹿而射之士
氣極寒常爲穴居以深爲貴好養豕食肉衣皮有狗
車木馬輕捷之便狗車形如船以數十狗拽之往來
遍運木馬形如彈弓擊足激行可及奔馬嗜半生米
飯漬以生狗血嗜酒醉則縛之不爾殺人其父母若

春夏死則埋之以其所寵奴婢所乘鞍馬殉葬秋冬
 死則以其尸餌貂故亦用是多得貂馬其親友死則
 以刀割額血淚交下謂之送血淚盜禁甚嚴惟正月
 十六日刑縱偷一日以為戲宋以前其國君民同川
 而浴肩相摩於道民雖殺雞亦召其君同食不知紀
 年但以草一青為一歲以豕膏塗身以溺洒手面作
 廁於中環之而居東夷中最無儀法者也及金人入
 中國後稍稍變夷風焉其譯語天為阿瓜地為納日
 為受溫月為別阿其山川最多長白山顛有潭周八
 鴨綠江北為混同江東太山俗甚敬畏之過者不得
 為阿也苦河禽獸皆白咳嗽有熊狼不害人人

亦不敢殺之為大明可明熒可為鯨睛鯨魚目睛也諸鷹種類不一惟殊角象牙魴鬚

皮有黃黑三種失刺孫即土好刺即各海豹叢居水涯常虎羆狐

如雁奴之屬其海牛紫色無角龜足鮎尾見人則飛

海驢常於秋日登島產乳海狗大如貓其腎野猪野

驢野牛皆出山中者魚獸名似猪其皮背斑文腹牛魚形

牛長丈餘重三百斤無鱗骨肉脂相間味極佳海人剝其皮懸之其尾隨潮以為起伏海人魚

形渾如人髮如馬尾皮肉極白陰形與男女無異土人鰥寡多畜之池沼中交合與人無異亦不傷人

水母一名蒲樗魚正白濛如沫無腹文林郎果也狀

建為奇臍頭目二蝦負之其行如飛

州

論曰昔周德甚盛肅慎氏第間一入貢爾猶且頒其賂物訓示後人蓋難之也在漢唐時挹婁靺鞨最小及女直滅遼勢遂強大竊據中原僭號天子而元乘其衰弱始能滅之然其故地酋長偃然南面自如也至我國家未煩介卒不費斗糧徒以聖詔一呼歸命納土遂設衛所定貢額永爲東北藩籬殆德過成周遠矣

日本

日本古倭奴國在大海中於閩浙爲東北隅漢滅朝鮮通使稱王者三十餘國初王都筑紫日向宮名御天中王次曰天材雲尊其後王遂著以尊稱傳二十三世彥瀲尊少子神武天皇遷都大和州疆原宮其後王遂以天皇稱建武初倭奴國奉貢朝賀光武賜以印綬至桓靈間倭國大亂歷年無王有一女子名曰卑彌呼年長不嫁能以妖術惑衆於是共立爲王法甚嚴峻侍婢千人少有見者惟一男子傳令而已曹魏時旣平公孫氏倭女王遣大夫難升米等來貢獻魏以金印紫綬封卑彌呼爲親魏倭王難升米等竝拜中郎校尉自是貢使往來相尋矣女王歿更立男王國人不服相攻擊不休復立卑彌呼宗女壹嗣

為王亂遂定壹立朝獻如初後復立男王竝受中國
爵命歷晉宋齊梁朝聘不絕晉宋時倭王名讚讚後
有名珍名濟名興名武者其世次皆有可考至隋開
皇中倭王姓阿每字多利思比孤遣使詣闕上令所
司訪其風俗使者言倭王以天為兄以日為弟天明
時出聽政跏趺坐日出便停理務云委我弟文皇曰
此大無義於是訓令改之大業初復遣使朝貢使者
曰聞海西菩薩天子重興佛法故遣朝拜兼沙門數
十人來學佛法其國書曰日出處天子致書日沒處
天子無恙云云帝覽不悅謂鴻臚卿曰夷書有無禮
者無復以聞明年遣裴世清使倭度百濟所歷有秦
王等十餘國惟秦王國其人同於華夏云先秦時遣
方士徐福將童男女數千人入海求蓬萊仙不得懼
誅止夷澶二州號秦王國世屬倭奴世清至倭王遣
使數百人設儀仗鳴鼓角來迎既入其都國王多利
思比孤與世清相見大悅曰我聞海西有大隋禮義
之國故遣朝貢今清道飾館以待大使與聞大國維
新之化世清曰皇帝德竝二儀澤流四海故遣行人
來此宣諭世清居倭未幾王命使隨清入貢唐貞觀
中遣使朝貢唐亦遣新州刺史高仁表往諭之與王

爭禮不平不肯宣天子命而還久之其王孝德即位
自孝德上至多利思唐書具載有姓名獻琥珀大如斗瑪瑙若五升器

時新羅為高麗百濟所暴高宗賜璽書令日本出兵
援新羅孝德歿二傳而天智立遣使者與蝦夷人偕
朝蝦夷人亦居海島中其使者鬚長四尺其髮上指
善弓矢珥箭於首令人戴瓠立數百步射無不中者
天智歿子天父立歿子總符立咸亨初遣使賀平高
麗後稍習夏音惡倭名更號日本使者自言國近日
所出以為名或云日本小國也倭併之故冒其號云
長安初遣朝臣真人粟田貢方物朝臣真人者猶唐

尚書也冠進賢冠頂有華鬘四被紫袍帛帶其國初
無冠於隋得所賜冠始制焉亦無文字刻木結繩於
百濟國得佛書始制焉粟田好學能屬文進止有容
武后授以司膳卿官還之開元初粟田復朝請從諸
儒授經詔四門助教趙玄默即鴻臚寺為師後悉所
賞物貨書以歸其副朝臣仲滿慕華不肯去易姓名
曰朝衡授以官職久之多所該識乃還後復入朝擢
官如故建元初遣真人興能來貢善書其紙似蠶而
澤人莫能識也時王名白壁自總符後女王二男王
五至此凡八傳矣貞元末王栢武遣使入朝其胄子

橘免勢願留肄業歷二十餘年使者來請免勢等還
詔然之大中中日本王子來朝獻寶器音樂王子善
圍碁出楸玉局冷暖王碁子不由制度黑白自然冬溫夏
暖故名至宋雍熙初日本僧裔然與其徒五人浮海
而至獻銅器十餘事并本國職員今年代紀各一卷
裔然善隸書而不通華語問其風土但書以對書言
國王世以王爲姓文武官僚亦然所載世次名號甚
詳第王世姓王氏與本史阿每氏者不同裔然之來
也帶有孝經一卷越王孝經新義各一卷皆金縷紅

羅標水晶爲軸孝經卽鄭氏註者越王乃唐太宗子

越王貞新義者記室參軍希古等撰也裔然求印本

大藏經詔給之後隨台州商人船還其國數年遣弟

子奉表來謝表辭頗工大略云傷鱗入夢不忘漢主

之恩枯骨合歡猶元魏氏之敵裔然誠惶

云

望落

日而西行十萬里之波濤難盡顧信風而東別數千

里之山嶽易過得觀宇內之瓌竒敢辭荒外之跋涉

遂使蓮華迴文神章出於北闕之北貝葉印字佛詔

傳於東海之東伏惟陛下惠溢四溟恩高五嶽世超

黃軒之古人直金輪之新在彼在斯只仰皇猷之盛

越山越海敢忘帝德之深裔然縱粉百年之身何報
一日之惠染筆拭淚伸紙搖魂上奏賜物遣歸咸乎
初建州海賈周世昌遭風飄至日本凡七年得還與
其國使至世昌以其國人倡和詩來上其詞彫刻膚
淺無足取也景德初僧寂照至熙寧間僧誠尋至宋
待之加厚賜紫方袍自是連貢方物而來者皆僧也
淳熙以後明州秀州泰州等地往往有日本海船爲
風泊而至者其人衆無口食或行丐於途中上聞詔
勿取其貨仍給常平米贍恤之候便風遣歸國宋亾
終元之世不肯奉命元遣使黑的趙良弼等并高麗
使往諭之不至遂遣將忻都范文虎及高麗將洪茶
丘等往征之至五龍山暴風破舟全軍皆沒而日本
竟不至也及國初 高皇帝卽位方國珍張士誠旣
滅諸豪悉航海糾島賊入寇以故洪武時數寇山東
浙福蘇松笏海諸郡遣行人楊載招諭之其使未至
於是復遣萊州同知趙秩賜璽書諭其王良懷秩至
宣言中國威德責其入貢良懷以元嘗使趙姓者往
欲襲之今秩復趙姓意將襲已以謾語答之命左右
刃秩秩不爲動徐曰聖天子生華帝華非蒙古比爾
殺我禍不旋踵我朝之兵天兵也無不一當百其戰

艦蒙古之戈船百不當一況天命所在人孰能違良
懷聞之氣沮股栗禮秩有加尋遣僧祖義隨秩奉表
稱臣入貢來朝然其剽掠如故也十五年明州備倭
指揮林賢交通樞密使胡惟庸謀叛令日本使僧如
瑤詐稱朝貢獻巨燭內藏火藥兵器伏精兵貢艘中
計以表裏挾上卽不遂掠庫物乘風而遁會事露悉
誅而發僧使於陝西四川各寺中著訓示後世絕不
與日本通於是遣信國公湯和江夏侯周德興等沿
海規畫自南直隸山東浙江福建廣東西咸置行都
司以備倭爲名犬羊盤錯矣永樂初太監鄭和等齎
賞下西洋諭諸海國日本首先歸附遣人來貢并擒
獻犯邊賊二十餘人卽付使人治之縛至甌中丞爇
詔厚賚之封其鎮山曰壽安鎮國山 上爲文勒石
賜勘合百道與之期期十年一貢無何三千人犯遼
東爲總兵劉榮所破殺無噍類榮封廣寧伯自是斂
迹不敢大爲寇而小小抄盜亦不絕出沒海中得間
則張其戎器而肆侵陵不得間則陳其方物而稱朝
貢菌載而歸以爲常矣至正統中乃入桃渚犯大嵩
劫倉庾燔室廬賊殺百姓積骸流血如陵谷縛嬰兒
於柱沃之沸湯視其啼號以爲笑樂捕得孕婦則計

其孕之男女別視以賭酒荒淫慘毒不可勝言嘉靖初其主源義植幼冲不能制羣臣右京兆大夫高貴使宋素卿貢亾何左京兆大夫內藝興遣宗設貢咸強請勘合後先至寧波爭長不相下宗設衆盛於宋素卿遂攻敗之追北至紹興躡諸郡縣殺掠以千計都指揮劉錦及千百戶等官遇之皆歿後有詔旨諭且下宋素卿獄始肯聽徐徐解自是倭奴嘯聚益繁桀驁孔熾而閩浙無賴之民爲之嚮導覘我虛實以故敢於深入而中國亾命者若王直徐海毛海峰之徒跳海聚衆變服欄王糾合倭舶往來行賈而奸商猾民覩其利厚私與互市違禁器物咸托官豪庇引黠者又多取其奇貨匿去莫耐舶人怒輒肆殺害公行剽掠於是吳粵之民食不暇炊臥不安枕農夫釋耒紅女寢機甚則族類離散逃竄別邑或父子老弱係虜相隨於路其歿傷者首身分離暴骨草澤頭顱僵仆相望於境沿海郡縣幾爲丘墟其禍慘於正統時矣事聞 朝廷慮之乃特設閩浙巡撫開軍門聽以軍法從事而所用撫臣朱紈素潔廉勇於任事往則日夜練兵甲嚴糾察上章暴二三勢豪通番狀竟爲勢豪詆劾以擅殺逮紈紈志自殺其所置副使柯

喬都指揮俞鏗諸能任事有功者皆論死繫獄乃罷
巡撫不復設而舶主土豪益自喜爲奸浸甚官司視
以目莫之禁矣頃之賊犯台州破黃巖象山諸邑議
復設提督都御史用王忬爲之忬經略稍有斬獲賊
於是移舟而南犯蘇松二郡無何忬改大同乃以李
天寵代忬而兵尚張經督其事時中外忻忻謂賊旦
夕可平會工侍趙文華以海道猖獗請禱海神遂遣
文華往禱公私勞費不貲皆歸囊橐而文華素忌經
經亦以材望自負文華恚則疏連劾經謂其才足辦
也特家閩避賊讐故嘆惜縱賊爾 上怒甚趣使捕

徵經經時已大破賊於嘉興斬首三千級溺水死者
稱是兵科言宜留經以賊平自効不聽併巡撫李天
寵皆論死文華旣已攘其功卽奏超巡按御史胡宗
憲代天寵督臣亦有更置由是中外文武皆束手斂
迹惴惴重足立憂不在倭矣文華俄還朝進太子太
保工部尚書而宗憲亦遂以兵部侍郎總督無何徐
海入寇圍巡撫阮鶚躡浙地告急疏上趙文華請出
督許之乃與宗憲誘徐海降而合兵掩捕平之徐海
死進文華少保宗憲亦遷右都御史又明年獲王直
王直者故徽人也以事走海上後爲舶主頗尚信有

盜道雖夷主亦愛服之有徽人羅隆文者豪俠士也故與直相識宗憲乃馳書命隆文往說之隆文至直所適直船中有二女見隆文泣數行下卽之則隆文故妓爲寇所虜也隆文密使二妓先諭意明日謁直直大喜相敘謹若生平隆文曰朝廷不以足下作逆之故壞汝廬墓戮汝親戚德意良厚今總督胡公吾黨人也倘能效順投款盡殲夷醜以安百萬生靈足下之功良厚胡公必奏授足下官職高爵厚祿榮歸故鄉不猶愈於寄身海島朝不謀夕使萬世而下有逆賊之名乎直聞之神搖色動猶未決會二妓耳語反覆勸之甚亟直瞿然曰願以死贖罪遂從隆文詣督府宗憲大悅優禮之卽具狀聞廷議以直元兇不可赦棄市而餘黨數萬復寇淮陽遂越如臯趨泰州勢甚熾時淮陽巡撫李遂多智略度賊無深謀若以計詒之東至廟灣可以決勝乃命防海副使劉景韶叅將丘陞守黃橋諸路而身當泰州之衝露宿野次激勵諸將士期以死戰士皆踴躍奮呼數合賊退却果從富安沿海堤掠而東遂喜曰賊在吾殼中矣復命景韶陞誘賊致廟灣縱兵擊之賊大敗無何賊自三沙至景韶陞與戰陞中鋒死景韶乃并陞衆遂又

飭諸路兵擊之賊復大敗賊間道奔劉莊裨將劉顯
 聞賊據劉莊乃奮勇躍馬而前而景韶鼓其後遂搗
 劉莊賊潰追及白駒場賊無一人得免者捷聞進遂
 南京兵侍景韶浙江按察使自宗憲遂屢捷之後於
 是浙西江東稍得安然而溫台閩廣如故也至四十
 年賊破興化等郡縣巡撫譚綸總兵戚繼光募浙兵
 大剿平之自是絃轍一新武衛稍振而旁海諸郡始
 免倭患云其地去閩浙近去遼東遠故今入貢者不
 從遼路國內有五畿三島七道六十五州六百餘郡
 屬國百餘總以倭名曰拘邪韓方五百里在新羅百濟東曰對海

方四百里多深林禽鹿成羣戶無良田食海物自活曰瀚海方三百里多竹木

給市糴曰末盧戶四千餘草木茂盛行不見前人曰

尹都曰不彌戶俱千餘曰奴國曰投馬戶俱三五餘曰邪摩維

即今倭王所都曰秦王前見其餘諸國小者百里大者四五百

里俱有名不盡錄各自專擅不相統攝其來寇者不知為何

國也土氣溫煖宜禾稻麻桑無牛馬虎豹羊鵲兵有

矛楯木弓竹矢或以骨為鏃人性嗜酒多壽考其至

百餘歲者為常男女相悅為婚人皆多妻不淫不妒

又俗不竊盜少爭訟犯法者沒其妻子大者滅其門

戶其死喪無異中國灼骨以上吉凶用中國古錢千

文價銀四兩惟不用開元永樂二種來寇多在清明
 重陽之後時多東北風久而不變故防寇者以三四
 五月為大汛九十月為小汛過此則不利於行矣若
 渡海時令一人不櫛沐不食肉不近婦人名曰持衰
 若途吉利則予以財物如疾病遭害以為持衰不
 謹便共殺之男子魁頭斷髮黥面文身婦人披髮跣
 足間用屨信巫好戲重儒敬佛其接見以蹲踞為恭
 以搓掌為悅飲食籍以檨葉手舖之或間用邊豆坐
 臥無几案牀帳編草為薦文皮為表席地坐臥其喜
 盜輕生好殺天性然也其譯語天為峻喇地為只日

為非祿月為讀急

與日本考畧
詳語不同

其山川壽安鎮國山

小樂初術
製賜刻碑

阿蘇山

山石無故火起接天
云其上有一夜光珠

其產如意寶

珠

青色大如雞子
有光云魚目精也

青玉硯扇細絹漆器

俱極精巧

金桃

實重一斤 為奇

論曰日本東海中大國也自後漢以來世世朝獻迺
 至元時獨絕蓋亦耻為虜下意云及元攻之不克志
 亦寢驕國初招之業已奉貢稱藩矣而寇掠如故
 太祖慮之乃絕其內款禁其互市瀕洋環島羅衛布
 堠而嚴為之防逃哉 聖謨貽謀深矣然久之安而
 忘危玩以生寇亭障弛而不設舳艫敞而不修倭奴

乃乘間竊發始則歲旱薦饑奮臂掠食林歿扶傷而
已迨後覘我阨塞諳我虛實遂至隰城岫邑斬將殺
吏積尸成林蕭條千里顧不痛哉 皇上震怒委任
重臣疇咨良將恩甚渥也然倭以瓦合之衆航海而
來勇略既踈貲糧亦乏而我以百萬熊虎之士坐而
制之是彼爲肉我爲斧謂宜詘指當以吉語聞也奈
何騷然荼毒連年不解者其故何哉蓋立功顯名相
成者什一而相傾者什九也昔當 皇上之特設督
撫也首用朱執事未竣而爲勢豪抵於法次用張經
李天寵事未竣而爲貴臣抵於法自是朝臣結舌邊
將斂手而倭奴益得志矣人徒知倭寇之來胡惟庸
爲亂首而豈知彼嫉賢誤國者罪亦不下胡惟庸也
卽有微功安足贖其罪哉曩非李遂譚綸戚繼光等
前後勦平之事猶未可知矣

琉球

琉球東南海中大國也漢魏至唐宋不通中國隋煬
帝令朱寬入海求訪異俗得河蠻言知有琉球遂與
河蠻俱往其國言語不通掠一人而返明年令寬往
撫之不從取其布甲而歸於是遣將陳稜等討之至
其都焚其宮室虜其男女千餘人并雜物產得金荆

橘木數十斤色如真金甚香遂班師歸是時其王姓
歡斯氏名渴刺堯不知其由來有國世次也自陳稜
攻破之後絕無聞琉球旁有毗舍那者小夷也鳥語
裸形殆非人類宋淳熙間其國之酋豪嘗率數百輩
猝至泉之水澳圍頭等村肆行殺掠性喜鐵器及匙
筋人閉戶則不入但刺其門環而去擲以匙筋則俯
拾之可緩數步見鐵騎則爭刺其甲遂駢首就戮而
不知悔臨敵用鏢鎗繫繩十餘丈爲操縱蓋愛其鐵
不忍棄之不駕舟楫惟縛竹爲筏可摺疊如屏風急
則羣舁之浮水而逃此夷之最小而險者也元至元

中海船副萬戶楊祥請以六千軍往降琉球不聽命
則遂伐之元主從其請繼有書生吳志斗者上言生
長福建熟知海道利病若欲收附且就彭胡發船往
諭相水勢地利然後興兵未晚也元遂命楊祥吳志
斗阮鑒等竝給金銀符往使琉球竟不能得其要領
而還及元貞初遣鎮撫張浩等討之禽生口百餘竟
不服也我朝洪武初遣行人楊載招諭日本還復
遣往琉球琉球遣使者隨載入朝貢獻詔所貢方物
俱於福建行省驗入項之其國分中山山南山北稱
三王各遣使請命詔賜中山王察度山南王承宗山

北王怕亥芝印幣永樂中中山王思紹遣使入貢表
言長史王茂中國饒州人也輔臣祖察度四十餘年
不懈於職今年已八十請命還鄉從之中山王遣子
侄及其陪臣子弟入國學上喜禮遇獨優賜閩人三
十六姓善操舟者令往來朝貢三王嗣封皆請於朝
以爲常至景泰時山南山北爲中山王尚思達所并
遣使朝貢嘉靖初國王尚真卒世子尚清上表請封
我遣給事中陳侃行人高澄往弔尚真并封尚清中
山王至閩尚清遣長史蔡承美等來迎以五月朔日
祭海登舟自是風濤浩蕩幾汨舟者數矣越十八日

至熱壁山山去琉球二百里夷人曰至此始可免憂
遂泊馬項之尚清遣法司官具羊酒菜果等物來迎
言天使遠臨世子不勝忻痛聞風伯爲從者驚敬遣
小臣奉迓侃等以其詞雅受之踰旬日方抵其國先
頒祭禮畢至七月二日乃頒冊封詔勅尚清冠服之
飾跪拜之儀悉如中國蓋其先期習之熟也其宴使
者禮甚恭仍用金鼓笙簫樂凡烹調之味皆假使者
庖人惟奉餞則出自宮嬪親製以表獻芹之意者精
潔芳旨但不過數十品而已侃等以九月十三日回
舟王及陪臣送至江滸無不相泣重別者行數日颺

風驟作桅折舵壞舟人失色但呼天妃求救頃之有紅光燭天舟人曰天妃至矣舟果得安至二十六日忽一蝶飛繞舟中復有一黃雀立於桅上時舟人有識者曰蝶雀神類天妃遣來告我風也宜善自防是夕果大風作浪濤驚天舟漏齊呼天妃尋有蝶數萬銜泥塞舟舟復得安次日遇順颺舟行如飛又次日遂行至定海泊焉出使外國者惟琉球最險而其神亦最靈故詳錄之未幾尚清上表貢獻言大明一統志中所載琉球有落滌及聚鬪髀事皆非實杜氏通典集事淵海羸虫錄星槎勝覽所述亦傳者之妄乞下史館從之落滌者琉球

水也其水最險舟到彭湖遇颺風作漂至落滌回者百無一二聚鬪髀者言其國王所居壁下多聚死人枯骨以為佳而民間門戶上亦安獸頭骨用此言出自寰宇記諸書而隋史北史亦載之故其國欲改去云其地居海島中多山洞國有四五帥統諸洞洞有小王往往有村村有鳥了帥竝以善戰者為之各理一村之事其初國俗以盈虛為晦朔以草木為冬夏人皆去髀黥手羽冠毛衣無禮節好剽掠自相攻擊鬪歿者收取聚食之仍以鬪髀獻至王所王則賜之以冠便為隊帥犯罪者輕則用杖重則繩縛以大鐵

錐鑽頂而殺之人死氣將絕時舉至庭浴其屍纏以布帛裹以葦草觀土而殯其南境有人死邑里共食之者男女相悅爲婚婦人產子必食子永年老者髮多不白事山海之神祭以酒肴鬪戰殺人卽以其人祭神此皆其未通中國時俗也迨今遣人入國學夷習稍變有華風焉凡司刑法錢谷等官皆土人爲武職其大夫長史通事官司朝貢爲文職皆三十六姓人及學於國學者爲之信鬼神女巫最尊女巫之魁曰女君白日呼嘯聚輒數百人攜杖戴艸騎步縱橫時入王宮褻遊御戲一唱百和音聲悽慘倏忽往來

矯誣禍福王及世子陪臣皆頓首拜跪云國人不軌神卽夜以告王昔倭奴有欲謀害中山王者神卽禁錮其舟水變爲鹽米變爲沙寇尋就戮惟其守護斯土故國中敬且憚之第未嘗殺人而祭之也王居山巔宮殿朴素亦未聞聚饗事富貴家稍有瓦屋餘皆茅茨地不產鐵故以螺殼爨無釜耕無鋤人皆耐饑渴勞苦寒暑不能侵亦無殘疾疲癯者不知醫藥而亦不夭札不生疾疫蓋其薄滋味寡嗜慾之驗也男子結髻用五色布纏頭以辨貴賤女人上衣外更加幅布如帷見人則取以蔽面下用細帽長裙以覆

其足無去髮毛衣羽冠之飾亦無產子必食子衣之事也賦法略如井田王及臣民各分土為祿食無征稅國有亭然後取之此皆近日風俗得王化之漸陶者第刑嚴峻盜竊即刑剗人皆驍健便乘善射鄰國視為勍敵然好爭狠鬪輒刃殺人度不能脫即剖腹自斃其譯語天為甸尼地為只尼日為非祿月為都及其山川龜鼉器古米山最險損舟彭胡島近福泉漳興四郡界天晴望之若烟霧中其國旁有沙華公國肆行劫掠商船漂至則擒人燒食之又有小琉球亦近泉州霽日登鼓山可望而見其人麤俗少入中國其產無牛羊驢馬惟鬪

鑲樹

以橋條細可織

木皮布

緝木皮為布潤三尺餘

金荆榴

可為几枕勝於沈香

雖入貢時或有諸物皆自他國貿易來者非本國所產也

論曰琉球僻居海島雄視東南自以為鳩巢之固也
用是歷代以來不襲朝貢隋元臨之以兵卒不奉命
至我國家向化獻瑗胄子就學其殆可以德綏未
可以威劫者耶俗本夷也今變華風其漸染深矣語
云夷進中國則中國之余謂琉球有焉

咸賓錄東夷志卷之二

終

錢世傑書
鄒邦傑刻

咸賓錄西夷志卷之三

明豫章羅曰聚尚之父著

哈密

哈密西域諸胡往來入貢要路也在漢時爲伊吾廬地昔漢明帝征匈奴取伊吾廬以爲屯田西域遂通蓋其地高腴宜五谷桑麻蒲桃故漢數與匈奴爭車師伊吾以制西域焉及明帝崩焉耆龜茲攻沒都護陳陸匈奴車師復圍戊巳校尉章帝不欲疲敝中國以事夷狄乃迎還戊巳校尉不復遣都護罷屯田以故伊吾遂爲匈奴有矣後班超定西域復得故伊吾

地鄧太后時西域畔超子班勇往平之於是龜茲等十七國皆來服從漢以伊吾傍近西域匈奴資之以為鈔暴復令開設屯田如永元時事置伊吾司馬一人統之隋初商胡雜居有勝兵千餘人附於鐵勒人甚驍悍厥田良沃隋末內屬置伊吾郡屬天下亂又臣突厥唐貞觀初以頡利破滅遂舉其屬七城來降因裂其地為西伊州自是遂為唐郡縣矣至石晉時其地為仲雲所據仲雲者小月氏之遺種也其人勇而好戰瓜沙之人皆憚之晉遣高居誨使于闐經其地仲雲遣宰相都督等官候迎云牙帳居胡盧磧者

即其地也宋王延德使高昌歷伊州地州將陳氏其先自唐開元初領州凡數十世唐時詔勅尚存蓋舊非都城無君長名號可紀故諸史無伊吾傳云元末族屬威武王安克帖木兒居之我朝永樂四年哈密遣使入貢詔封安克帖木兒子脫脫為忠順王賜以金印所統有回回畏兀兒哈刺灰三種各以其酋目為都督佐之并前洪武時所設關外衛共有七衛

曰哈密曰安定無城郭地廣千里曰阿端分安定地俱洪武八年置曰赤

斤蒙古永樂二年置古月氏地也曰曲先永樂四年置曰罕東曰罕東

左二衛皆洪武三十年置地在沙州其國勢極弱俱在嘉峪關西而哈密又

在六衛西東去肅州西去土魯番各千五百里北至瓦刺數百里凡西域天方等三十八國貢使至者咸置哈密譯文具聞乃發脫脫卒三傳而孛羅帖木兒嗣尋爲其臣下所殺王母努溫答力主國事嚴毅有威國人畏服有謀弒之者見其面則戰慄失措劔器皆墮成化中土魯番酋長阿力調其衆掠赤斤蒙古不從恚卽以兵劫王母及金印去哈密及三種夷無主遂散居苦峪諸山谷或歸附居甘肅州亦有隨土魯番去者甘州守臣上其事遣通政劉文高陽伯李文往經略之竟不能得其要領而還甘肅守臣乘間請以王母甥罕慎襲王哈密時阿力死阿黑麻代之罕慎貪而殘失衆心弘治初阿黑麻挾詐殺罕慎據其城上言罕慎非王裔請自王哈密馬文升議不許言非得元之遺裔不足以攝服諸番因命通事於諸番中訪忠順裔派得王侄陝巴上聞遂封陝巴忠順王主國事未幾阿黑麻復虜陝巴及金印去時兵侍張海以經略哈密在嘉峪關外表言請閉嘉峪關絕西域貢令諸夷歸怨阿黑麻而馬文升亦同此議乃西域諸夷怨朝廷賞賜大減又沮其由海道貢獅子反相率從阿黑麻阿黑麻遂復入哈密自稱可汗大

掠罕東諸夷已而阿黑麻西去留其將牙木蘭守哈
密精兵不過四百騎撫臣許進帥臣劉寧謀知之乃
用馬文升議效陳湯故事以副總兵彭清率番漢兵
三千襲破哈密牙木蘭遁去

詳見許襄毅
公平番始末

無何阿黑

麻送回陝巴及金印而陝巴復故封陝巴卒子拜牙
立時阿黑麻亦卒其子滿速兒立乃令其酋目火者
他只丁襲破哈密逐拜牙而以數萬騎掠我肅州兵
備陳九疇媾瓦刺達兵掠土魯番頗有斬獲而兵尚
王瓊中傷之遂下九疇詔獄未幾復起巡撫甘肅滿
速兒入寇九疇奮勇力戰土魯番大敗頃之九疇竟

為瓊中傷論戍而拜牙勢窮從土魯番其回回畏兀
兒哈刺灰三部亦皆歸附於是兵尚胡世寧上言哈
密諸族已自歸土魯番餘入居肅州者已久欲驅之
出不可也然則哈密將安興復哉即求其嫡派立之
誰與為守不如閉嘉峪關置哈密不問會尚書桂萼
議亦同朝廷從之時王瓊發兵境上土魯番稍却又
為瓦刺所攻不獲為寇至嘉靖初滿速兒遣使同天
方諸國通貢然哈密不復城而金印失矣其地自陝
西蘭州渡河千五百里至肅州肅州西七十里為嘉
峪關關外並稱西域而陝西以南直四川抵雲南徼

外竝稱西番其關之最西則為哈密俗獷悍好利居

惟土房諸夷雜處故衣服異制飲食異宜其山川天

山一名雪山虜過馬駿山有望鄉嶺嶺上合羅川唐

此者皆下馬拜產鑛鐵有自然花紋價直過銀四味

木其實如棗以竹刀則甘鐵刀則大尾羊斤小者一

斤肉如熊野野蚕綿蚕生苦參上為奇

高昌

高昌即火州以其地勢高敞物產昌盛故名高昌又

山色如火天氣常熱故亦名火州本漢車師前王故

地所謂交河城是也西域長史戊巳校尉竝居焉其

地有漢時高昌壘故以為國號晉以其地為高昌郡

呂光張軌沮渠蒙遜據河西皆置太守以統之魏世

祖時有闕爽者自稱高昌太守尋為沮渠無諱奪據

之無諱死其地又為蠕蠕所并立闕伯周為王高昌

之稱王自此始也伯周歿子義成立其從兄首歸殺

義成篡之首歸又為高車王阿伏至羅所殺尋為張

孟明馬儒相繼王之俱為國人所害遂共推馬儒長

史翹嘉為主會嚙噠破焉耆焉耆眾不自立請主于

嘉嘉以第二子為焉耆王高昌由是始大元魏時朝

貢不絕俗好書故遣使奉表自以邊遐不習典誥求

借五經諸史并請國子助教劉燮以爲博士許之嘉
歿子堅立梁武帝時遣使貢羊刺客上遣杰公逐之
杰公曰平城羊刺無葉密色明白而味甘鹽城羊刺
葉大密色青而味薄是密乃鹽城產者詢之使者果
如其言頃之獻鳴鹽枕蒲桃良馬氍毹等物隋開皇
中突厥破其四城有二千人來歸中國時堅歿子伯
雅立以大業五年來朝從擊高麗還隋以宇文氏女
華陽公主妻之唐武德中遣使獻狗雌雄各一高六
寸長尺餘性甚慧能牽馬銜燭云生佛菽中國始有
佛菽狗矣貞觀初其王文泰來朝文泰伯雅子也後

與西突厥連結諸國朝貢者路出高昌文泰稍壅絕
之太宗下詔讓其反覆遣使李道裕往問狀文泰遣
使謝太宗引使責而主數年朝貢不入無藩臣禮我
使人往文泰猥曰鷹飛于天雉竄于蒿猫遊于堂鼠
安于穴各得其所豈不快耶明年當發兵以擊而國
而主善自圖尋復諭入朝文泰稱疾不至乃遣將侯
君集薛萬契苾何力牛進達等帥兵討之文泰聞王
師至悸駭無他計發病歿子智盛立君集等以兵薄
其城智盛降君集分兵略定凡三州五縣二十二城
戶八千口三萬馬四千先是其國人謠曰高昌兵如

霜雪唐家兵如日月日月照霜雪幾何自殄滅文泰
捕謠所發不能得也捷書聞太宗大悅宴羣臣班次
策功赦高昌所部披其地爲西州而置交河天山柳
中蒲昌高昌六縣初西突厥遣其葉護屯兵於可汗
浮屠城與高昌爲影嚮至是懼而來降以其地爲庭
州置蒲類縣時魏徵褚遂良皆諫言宜立高昌人爲
王書上勿納君集遂勒石紀功凱還獻俘徙高昌豪
傑于中國智盛并弟智湛俱封郡公麴氏傳國九世
凡百三十四年而亾智湛有子昭好學有鬻異書者
母顧筥中金歎曰何愛此不使子有異聞乎盡持易

之昭歷司膳卿頗能辭章弟崇裕有武藝永徽中爲
右武衛翊府中郎將封交河郡王及安史之亂其地
陷沒復自爲國然其地頗有回鶻故亦謂之回鶻宋
建隆中來貢乾德初西州回鶻可汗遣僧法淵獻佛
牙琉璃器琥珀盞太平興國中其國王師子王遣使
來獻宋遣王延德至高昌會師子王避暑於北庭去
高昌治所千餘里乃邀延德至北庭王及王子侍者
皆東西拜受賜待延壽甚恭雍熙初延壽還敘其所
歷來獻云語詳見宋史中國朝號火州永樂七年
土酋遣人朝貢十二年吏部員外郎陳誠至其國還

言其國風物蕭條市里民居僧堂過半亦皆零落東
有荒城故址云古高昌國治自宣德以來或三年五
年朝貢不絕其地城東七十里曰柳陳即唐柳中縣
也西百里曰土魯蕃即唐交河縣也其人貌類高麗
目深鼻高辮髮後垂衣尚錦繡俗婦人戴油帽名蘇幕遮
唐以為曲名有城郭田畜兵器書史婚姻喪葬與華夏同
蓋其先為唐朝郡縣故也事天神信佛法字亦有真
艸頗似韃靼亦常借用回回語音好騎射時節潑水
為戲地無雨雪每盛暑人皆穴地而居飛鳥羣聚河
濱或起飛則為日氣所爍墜而傷翼其山川奇秀者

最多有靈山不其黑紗貪汗山積雪火焰山出礪砂

氣湧出至夕光焰若天山即祁連山蒲類海一名瀚

海地沙深五尺若大其產羊刺草也其味佳白疊子草實

也如繭中有細絲取砂鼠鷲禽捕食之赤白鹽白者如玉赤者如金

火蚕絲絮衣一襲止用一兩稍過度為奇

土魯蕃

土魯蕃亦車師地昔漢武帝遣使通西域樓蘭車師
當道苦之攻劫漢使王恢等又數為匈奴耳目武帝
遂遣趙破奴擊破車師至宣帝時分以為車師前後
王歷魏晉唐宋皆總屬高昌詳具見高昌志中元屬

畏兀兒部我朝永樂二十年吏部陳誠至其國宣德五年始遣使來貢以後不絕弘治間番酋阿力阿黑麻父子擾我西鄙虜我哈密忠順王卽是時專伺哈密至正德間遂數犯我甘肅語在哈密志中弘正間土魯番十三人入貢稱王者一人嘉靖初稱王者十五六人禮部議回勅書宜但稱王一人五年一貢爲便從之當是時土魯番殘破我嘉峪關外七衛及城郭諸國地廣人衆非復陳驗封奉使時矣其地峻壑窮崖天巧奇絕氣候煖少雨雪不生艸木少禽獸性最奸狡西夷諸種不如去哈密千餘里中經黑風水艸俱乏勢難遠據黠虜之計徒欲挾此以要利耳人皆屋居土宜麻麥其產瓜菓羊馬之類

魯陳

魯陳古柘中地我朝宣德五年魯陳萬戶瓦赤刺遣人來貢其地中經大川砂磧無水草牛馬過此輒死道傍多骸骨有鬼魅行人失侶白日迷亾夷人謂之旱海西行出流沙河北出火焰山山色如火氣候和煖風俗淳朴居人有回回畏兀兒二種土宜稌麥麻豆物產惟小蒲桃甘甜無核爲佳論曰昔漢通西域當時以爲斷匈奴右臂然必得伊

吾柳中車師諸地而後西域可通則哈密高昌之爲
中國利害甚明也我國家封護哈密蓋亦漢帝之
遺意云及土魯番殘破七衛之後遂議棄哈密閉關
絕貢余謂此權宜之術非久安之策也昔漢立都護
匈奴世世稱藩今倘於伊吾車師故地設以督府鎮
以重臣而屯田置員若漢家故事諸夷酋長仍封其
爵第令之受我節制永爲外臣使西戎北虜兩不相
通則邊陲可永無虞而國家之固如盤石矣

撒馬兒罕

撒馬兒罕漢爲翳賓隋爲漕國西域中大國也去嘉
峪關萬里漢武帝通西域翳賓自以絕遠漢兵不能
至其王烏頭勞數剽殺漢使者烏頭勞死子代立遣
子奉獻漢使關都尉文忠送其使忠因與其國容屈
王子陰末赴共謀殺翳賓王而以漢印綬立陰末赴
元帝時陰末赴復殺漢使趙德等七十餘人上書貢
謝漢欲遣使者報送其使杜欽上書說王鳳乃止魏
晉以後無聞至元魏復通焉其王都善見城遣使朝
獻在隋更名漕國其王姓昭武字順達康國王之宗
族也國法嚴整其俗淫祠有順天神祠渾以金銀爲
之祠前有一魚脊骨其孔中通馬騎出入大業中遣

使貢方物至唐復名獬廩王居修鮮城武德中遣使
 貢寶帶金鎖水晶頗黎蓋貞觀中貢俱物頭花丹紫
 相間其香遠聞又貢名馬太宗語大臣曰昔魏徵勸
 我修文德安中夏今中夏安四夷貢獻皆徵力也乃
 遣使厚齎賜其國王使至獬廩王再拜受命仍遣人
 導至天竺項之獻獬廩特鼠喙尖尾赤能食蛇螫者嗅
 且尿瘡即愈顯慶三年以其地為修鮮都督府拜其
 王為修鮮都督開元天寶間屢遣使朝貢獻天文書
 及秘方奇藥又獻上清珠光明潔白可照一室視之
 有仙人玉女雲鶴之象搖動於其中及代宗即位寶

庫中往往有神光異氣上令檢出之每有水旱兵革
 之災禱之無不驗者蓋奇物也宋時未通我朝洪

武中國主帖木兒遣使貢駝馬詔厚賜之帖木兒者
 故元主駝馬也後復貢馬貢海青歷洪武朝凡四遣
 使奉貢馬而我遣給事傅安郭驥至西域留撒馬兒
 罕以其國豐腴偉麗宜居故也永樂初安等還言帖
 木兒次孫哈里嗣上遣使祭帖木兒賜哈里璽書

銀幣哈里貢謝復遣傅安報使至洪熙元年安始還
 國正統十二年貢玉石成化十九年阿黑麻王貢二
 獅子夷使請大臣出迎郎中陸容言獅子之為獸在

效廟不可以為犧牲在乘輿不可以備馭服理不宜受禮尚周洪謨亦以為不可命官出迎詔遣中官迎之獅子日食生羊二醋酣密酪各二瓶官養獅人光祿日供給馬弘治二年遣使貢獅子夷人所過橫為侵擾給事韓鼎上言珍禽異獸非宜狎玩且供費不貲宜罷遣之未幾廣東布政陳選上言撒馬兒罕使臣泊六灣貢獅子欲從廣南浮海往滿刺加更市獅子入貢不可貴異物開海道利賈胡貽笑安南諸夷三年由南海貢獅子禮官倪岳言南海非西域貢道請却之自後貢皆從嘉峪關入嘉靖中其國稱王者

五十三人皆遣人入貢地宜五穀王居高廣市肆稠

密頗類中原西南番貨多聚於此其民巧彫文刻鏤

織剝刺文綉尤善治室市易銀錢泥金書經山川景

物頗類中原大抵如漢書所載今其俗尚未改也國

東有養夷國小處孤城沙鹿海牙民依崖谷居頗蕃庶有極臭草熬汁

為阿魏有細窰籃五穀蕃殖有黑蜘蛛啣人致疾中草熬膏如蜜

方愈達失干地狹人稠宜迭里迷居民僅千百滋畜蕃息河西有蘆林多獅

子諸城皆隸焉其山川曰鐵門峽曰哈刺卜蘭河其

產有鬱金香色正黃與芙蓉花相似罽苾思檀樹葉類山茶實類銀杏而小

水晶鹽堅明如水晶琢為盤以水濕之可和肉食花菜布大尾羊見前狡猊

生七日未開日時取之易調習稍長則難馴伏以其筋為琴弦一奏餘弦皆斷取一滴乳并他獸乳同置器中諸乳皆化為水

瓦矢實

香草可辟蠹

為異

論曰昔旅葵之訓禽荒之戒龜鑑昭然撒馬兒罕萬里貢環足徵內治修矣第貢惟獅子夫獅子日食萬錢一咆哮即虎豹皆伏茲固狺獍之獸也以中人數十口之費日給一不可馴馭之物謂緩急何況中國所貴外夷賤之故南越以孔雀珥戶昆山以玉璞抵鵲中國得之以為奇物夫獅象亦若是已倘四夷聞之各以所賤易其所貴殆非所以實內帑而撫遠人也陸容諸臣之論慮且遠矣

天竺

天竺一名身毒大國也地方三萬餘里分中東南西北五天竺國即所謂五印度也國各有王地各數千里東印度與扶南占城鄰但隔小海爾南印度際大海西印度與罽賓波斯接北距雪山四面皆山惟南通一谷為國門其中印度則據四印度之中有別城數十皆置長別國數十置王曰舍衛曰伽尸即波羅柰也曰伽毗黎曰蘇摩黎曰斤施利曰摩伽施曰婆羅門曰婆黎等國皆屬中天竺者而四天竺亦各有屬國數十難以盡紀矣自漢張騫見蜀布邛竹杖身

毒之名始通中國遂獻白玉連環羈馬腦石爲勒白
光琉璃爲鞍鞍在閭室中常照一十餘丈如晝日自
是長安盛飾鞍轡競加彫鏤由身毒之獻始也後爲
大月氏貴霜王所滅遂屬月氏馬至和桓時復遣使
貢獻世傳明帝夢見金人遣使天竺求佛於是佛教
遂傳中國圖畫形像馬楚王英始信其術而桓帝好
神數祀浮屠老子百姓稍有奉者後遂轉盛魏晉絕
不復通惟吳時扶南王范旃遣使蘇勿至其國天竺
王驚曰海濱極遠猶有使者來乎卽遣使陳宋等以
月氏馬四匹報旃勿往四年方得還國是時吳遣中

郎康泰使扶南及見陳宋等具問天竺土俗言其國
人淳龐土沃饒王號茂論習尚靡麗大有華風宋文
帝元嘉時天竺屬國伽毗黎國王月愛遣使奉表獻
金剛指環摩勒金環寶物赤白鸚鵡各一明帝時復
遣使至以其使爲建威將軍以後蘇摩黎國斤陀利
國婆黎國俱入貢矣梁武天監初天竺王屈多遣長
史竺羅達奉表獻琉璃唾壺雜香吉貝等物魏宣武
時南天竺遣使獻駿馬云其國出獅子貂豹獬橐駝
犀象有火齊如雲母而紫色列之則薄如蟬翼積之
則如紗縠之重沓有金剛似紫石英百鍊不消可以

切玉餘玳瑁琅玕諸香器物不可勝紀多與大秦安
息扶南交趾貿易往來蓋西番之一大都會也隋煬
帝遣使裴矩通西域諸國惟天竺佛菴不至爲恨唐
武德中中國大亂天竺王尸羅逸多勒兵戰象不馳
鞍士不釋甲因破四天竺皆北面臣之會唐浮屠玄
裝至其國尸羅逸多召見曰而國有聖人出作秦王
破陣樂試爲我言其爲人玄裝粗言太宗神武四夷
賓服狀王喜曰我當東面朝之貞觀中遣使上書帝
命騎尉梁懷敏持節慰撫尸羅逸多驚問國人自古
亦有摩訶震旦使者至吾國乎皆曰無有摩訶震旦

者華言中國也王出迎膜拜受詔書戴之頂復遣

者隨入朝獻火珠鬱金香提樹項之唐遣長史王言

策使其國會尸羅逸多次國人亂其臣阿羅那順自

立發兵拒言策時從騎纔數十戰敗皆沒言策挺身

奔吐蕃西鄙檄召諸鄰國兵吐蕃以兵千人來泥婆

羅以七千騎來言策部分進戰於茶罇和羅城

中天竺城三日破之斬獲無算遂擒阿羅那順俘送闕下

唐擢言策朝散大夫得方士那羅邇婆娑寐自言壽

二百歲有不死術帝改館使治丹遣使者馳采怪藥

異石後術不驗竟死長安是時摩伽陀國獻波羅樹

那揭國獻方物烏茶國獻龍自天竺屬國多入貢

矣烏茶國者地方五千餘里人工禁術其國有神化

為土蟒以濟饑渴又與孔雀啄滄泉以愈眾疾蓋神

異之國也高宗時盧伽逸多者烏茶人亦以術進拜

懷化大將軍自後天竺來使皆曰蕃夷以袍帶為寵

唐輒以金帶錦袍賜焉乾元末河隴陷沒遂不至矣

至周廣順初僧薩滿多復入貢名馬宋乾德後來獻

不絕矣天竺之法國王次太子襲位餘子皆出家為

僧不復居本國有曼殊室利者乃其王子隨中國僧

至馬太祖今館于相國寺善持律都人傾嚮之財施

盈溢眾頗疾焉以其不解唐言即偽為詔求還本國

詔下曼殊室利不得已附南海賈人而歸後不知所

終太平興國間益州僧光遠至天竺以其王沒徙曩

表來上表稱唐天子為支那皇帝云自是後僧密怛

羅僧法吉祥僧善稱等凡四來朝獻或貢梵書或貢

佛骨銅牙菩薩像宋皆賜以束帶紫方袍馬元太祖

西征滅回回國其王禿奴遂進次西印度國遇大獸

高數十丈角如犀牛作人語曰此非帝世界宜速還
耶律楚曰此名角端旄星之精靈異不可犯也遂班
師還我朝有詔納樸兒亦印度之一也永樂中遣

太監侯顯等賫詔往諭之至其境國王一不刺金玉
遣金銀柱杖各二人奉迎引導柱杖者其國大臣名
也至則其王拜詔叩謝甚恭及畢鋪氍毹於殿地待
我天使宴我天兵燔炙牛羊禁不飲酒恐亂其性惟
以薔薇露和香蜜水飲之宴畢復贈正使副使及諸
官兵金銀盔甲瓶盆盞蓋等物有差尋置金筒銀葉
表文遣使隨顯等貢獻方物又有榜葛蘭卽西天東
印度也永樂六年國王嚳牙思丁遣人朝貢十二年
王蹇弗丁遣使貢麒麟禮部請上表賀 上曰卿等
但當竭心輔治以惠天下天下旣安雖無麒麟不害

爲治其免賀以後二國久不通貢其地土廣人稠財
物豐衍市用銀錢海貳民好耕植一歲二收王居極
侈禮法森嚴男女皆黑男剃髮白布纏之身服從頭
套下下圍以帨女短衫下圍色布絲綿不施脂粉惟
嬌艷者生而白色耳垂寶鈿項挂嬰絡腕金鐲手足
戒指甚可觀也傳言先時人性獷悍以戰歿爲吉利
以善終爲不祥至周老聃惡其彊暴出關化之作浮
屠法令其內外剪除不傷形體後卒托生爲佛仍修
老子之道以故至今俗甚淳美不相殺伐亦有文字
交易雖萬金亦價定量平略無怨悔賦有十二刑有

笞杖流徒陰陽醫卜藝技大類中國有一種人不食
 肉味夫歿妻不再嫁夫不再娶若孤寡無倚一村之
 家輪養之不容別村求食其義氣如此亦有女人稱
 衍衍者粧服華麗人家飲宴亦來侑觴口唱番曲對
 舞又有人曰根肖速嚙奈者蓋優人也能作百戲并
 伏虎日往人家索錢其山川古蹟則聖水能止風濤
 琉璃乘之遇風貴賤不同其產細布有五兜羅錦厚四五尺
 酒之即止面毛絨絨名白樹皮紙滑澤光潤波羅密味佳奄
 騫里黑騫勒角長四尺十日一割不割則死龍
 摩勒甚佳稍割牛人飲其血壽五百歲牛壽如之龍
 腦香狀類雲母絲縣鑛鐵鎗剪極巧漆器磁器俱極

為奇

婆羅門

婆羅門即古師子國東晉時通焉天竺屬國也其地
 西海之中延袤二千餘里多出奇寶四時和適無夏
 冬之異五穀隨人所種不須時節其國舊無人止有
 鬼神有龍居之諸國商賈來共市易不見其形但珍
 寶明其所堪價商人依價取之諸國人聞其土樂因
 此競至或有停住者遂成大國晉安帝義熙初遣使
 獻玉佛像高四尺二寸五色潔潤形制殊特殆非人
 工歷晉宋代在建康瓦官寺其後宋元嘉梁大通唐

總章天寶間朝貢不絕獻有大珠鈿金寶纓等物宋
淳化中闍婆國使來言其鄰國有婆羅門者其人善
法察人情人欲相危害者皆先知之至大觀中婆羅
門遣使來貢詔禮之如交趾及今我朝永樂中遣
使貢真珠玳瑁瑪瑙車渠等物賜王及妃文綺其地
負山面海念佛素食風俗土產大略與天竺同

論曰昔列子言西方有聖人由余言化人石佛霍去
病得祭天金人漢哀時博士景慮口傳月氏人浮屠
經佛之興其來久矣張騫西通身毒第言其地多暑
濕乘象而戰略未及奉浮屠事豈其未之察耶夫恒

星不見咎徵也而或以周莊之十年恒星不見爲佛
生之始謬矣彼道家流乃謂周莊十年老子遣尹真
人喜乘月精白象下天竺於淨飯夫人口中託生爲
佛蓋詆釋也釋氏亦謂摩訶迦葉下生世間號曰老
子蓋詆道也而釋氏甚且詆聖言寶歷菩薩生爲伏
羲吉祥菩薩生爲女媧淨光童子生爲仲尼月明童
子生爲顏淵茲愈不經之說矣大抵三代以前已有
佛法故關帝譏而不征特其名自漢明時始著其教
自達摩西來始盛爾余因志天竺諸國事故敘及之
以俟博識者考正焉

亦力把力

亦力把力漢龜茲也昔昭帝以杆彌太子名賴丹者為校尉田輪臺輪臺與龜茲地相連也龜茲貴人姑翼與王謀共殺賴丹宣帝時常惠使烏孫還便宜發諸國兵攻龜茲執姑翼斬之語在惠傳會烏孫公主遣女至京師學鼓琴漢遣使樂奉送王女過龜茲龜茲王留不遣公主遂妻之元康初龜茲王絳賓與王女入朝自以為漢外孫婿也漢厚賜之留一年遣歸後數來朝賀自是衣服宮室侍從周衛出入傳呼撞鐘鼓如漢家儀然時胡人皆曰驢非驢馬非馬若龜

茲王所謂羸也絳賓死其子承德自謂漢外孫成哀間往來尤數漢待之亦甚親密王莽時絕東漢初復通以後或通或絕無常王矣魏文帝即位遣使貢獻晉武初遣子入侍及惠懷之亂朝貢絕矣秦苻堅遣將呂光伐西域至龜茲龜茲王白純載寶出奔光入其城城有三重外城與長安城等室屋壯麗飾以琅玕金玉光立白純弟白震為王而歸白震之後惟周保定初隋大業中遣使朝貢方物唐貞觀初其王蘇伐疊獻馬太宗賜璽書撫慰之後臣西突厥郭孝恪伐焉耆龜茲乃遣兵與焉耆影援太宗怒議討之是

夜月食昴詔曰月陰精用刑兆也昴胡分數且終乃遣將阿史倫杜尔及契苾何力郭孝恪等發鐵勒十三部兵十萬討之杜尔分五軍掠其北執馬耆王阿那支龜茲大恐王及酋長皆棄城走杜尔遣伊州刺史韓威擊破之王計窮保撥換城杜尔圍之閱月執王及其將羯獵相那利詣軍杜爾凡破五大城男女數萬遣使者諭降小城七百餘西域震懼乃立其弟葉護爲王勒石紀功而歸獻俘闕下太宗喜謂羣臣曰夫樂有紀朕嘗言之土城竹馬童兒樂也金翠羅紈婦人樂也貿遷有無商賈樂也高官厚秩士大夫

樂也戰無前敵將帥樂也四海寧一帝王樂也朕今樂矣遂徧觴之初孝恪之擊焉耆也龜茲有浮屠善數歎曰唐家終有西域不數年吾國亦亾果如其言太宗赦其王布夫畢罪拜中郎將遣歸國項之龜茲亂唐復破之以其地爲龜茲都督府更立布夫畢子素稽爲王授都督職長壽初王孝傑破吐蕃復四鎮地置安西都護於龜茲以兵三萬鎮焉於是沙磧荒絕民供貲糧苦甚議者請棄之武后不聽都護以政績著者杜進田揚名郭元振張孝嵩云開元中王孝節遣弟孝義來朝獻遊仙枕枕之而寐則九州三島

皆在其中蓋奇物也以後未通宋自祥符至熙寧中
入貢者凡九云其國王自稱師子王永黃衣寶冠與
宰相九人同治事紹聖三年遣使以表章獻玉佛至
洮西熙河經略使以其罕通使請令於熙秦等州博
買而估所齎物價答賜遣還從之元時名別失八里
宣慰司領之我朝洪武永樂間三入朝貢吏部陳
誠至其國後歪思弒其國王納黑失只罕自立為王
號亦力把力宣德二年脫歡阿魯台歪思各遣人朝
貢賜金幣加賜歪思金刀甲冑正統後來貢不絕其
地逐水草住牧地寒深山大谷六月飛雪俗獷戾服

用污穢上下無紀律性多淫置女市收男子鐵以入
官土多孔雀人取食之西北有大山有泉如膏流出
成川行數里入地狀如餽餽甚臭服之齒落更生每
元日鬪牛馬馳為戲七日觀勝負以占一年羊馬之
繁息衰耗其山川白山亦出金嶺嶺多熱海氣候產
犖牛鬣觥白鬣布銅鐵等物

論曰龜茲本西域城郭大國元時始以北虜居之故
其習俗亦異如本志所載昔則土著今則遷移昔則
侈麗今則污穢何哉蓋鳥窠獸窟各安其性雖元竊
據中原乎而衣皮飲血猶不能盡革夷風何怪亦力

把力之不若龜茲也

佛秣

佛秣唐書云卽漢大秦國也一名犁軒武帝遣使至安息安息獻人二皆戚眉峭鼻亂髮拳鬚長四尺五寸是其國人也元封初大秦貢花蹄牛高六尺尾環繞其身角端有肉蹄如蓮花善走多力帝使輦銅石以起望仙宮足跡皆如花形自後遂絕其國在海西之西又名海西從條支西度海曲萬里去長安蓋四萬餘里地方萬里城四百勝兵百萬小國役屬者數十十里一亭三十里一堠路無盜賊但有猛虎獅子

爲害行者非羣則不得過其國其王都城廣八十里門高二十丈釵以黃金宮殿以瑟瑟爲柱水精琉璃爲椽異寶飾門香木梁黃金爲地無陶瓦白石墜屋堅潤如玉盛暑引水上流氣爲風有貴臣十二共治國事國有大災異輒廢王更立賢者亦無怨言其人長大平正頗類中國故謂之大秦或曰本中國人也

有幻人能額上爲炎燼手中作江湖舉足而珠玉自墮開口則幡旒亂出有善醫能開腦取虫以愈目青其王輒欲通漢而安息欲以漢繒帛與之交市故遮閔不得自達昔班超遣掾甘英使大秦臨大海欲度

而安息西界船人謂英曰海水廣大入海人往來皆賚三歲糧海中善使人思土戀慕數有死亾者英乃止及栢帝延嘉初大秦王安敦遣使自日南徼外來獻象牙犀角玳瑁始乃一通焉其所表貢竝無珍異疑傳者隱之也至晉太康時復遣使貢獻唐貞觀中佛秣王波多力遣使獻赤玻璃綠金精下詔答賚時大食稍強遣大將軍摩拽伐之佛秣約和遂臣屬焉乾封以後凡再來朝獻開元中因吐火羅大酋獻獅子羚羊五代時無聞宋元豐時國王滅力伊靈改撒始遣其首領來獻鞍馬刀劍真珠言其地甚寒土屋

無瓦礫有篋篋壺琴小箏箎偏鼓皆國中樂也王衣紅黃衣以金線織絲布或五色布纏頭貴臣冠服亦如之每歲三月則詣佛寺坐紅牀使人昇之元時其國人多居中國者我朝洪武初遣其國故民捏吉倫賚詔諭之尋遣使朝貢其俗不尚戰鬥鄰國小者爭但以文字相問大則加兵賦稅但以治事小大為差刑罰輕者杖數十重者至二百大罪則乘以布囊而投諸江其候時日懸大金秤以十二金丸係之每至一時金丸輒落毫髮無差鑄金銀錢無孔面鑿彌勒佛背為王名禁民私造其產五色玉青黃赤黑夜

光壁木難珠

碧色木難鳥口中結沫所成

降真香

燒之引鶴

駭雞犀

通天

犀也以盛米雞喙之至輒驚去

寶

似狗獾惡多力

却火雀

似燕置火中火滅其雀無傷云因浴

沙水受卵故然

西錦柰祇花

取油塗身可以去風

千年棗阿勃參

油宜塗癰

疥大效價極貴

肉汁酒

地有蠟虫剖其肉重疊以石壓之瀝汁取外國州子釀於肉汁中經數日

成酒飲之味佳

龍種羊

以羊臍種土中溉以水聞雷而生臍屬地中刀割必久俗擊鼓驚之臍斷

便行齒州至秋可食臍內復有種

為奇

論曰大秦西域之沃土也唐書以為佛菴似矣顧其

國自漢歷唐貢獻不絕而宋史以為自古不通中國

考之國朝佛菴風俗土產皆類宋史而與漢唐二

書所載者大相懸絕何謬謚之甚耶或者唐之佛菴

即古大秦而宋與國朝之佛菴與之名同而實異爾

蘇門答刺

蘇門答刺漢之條支唐之波斯大食皆其地也昔張

騫通西域還為武帝言條支在安息西海暑濕耕田

田稻有鳥卵大如甕人眾甚多往往有小君長而安

息役屬之以為外國國人善眩安息長老傳聞條支

有弱水西王母止日所入而未嘗見云以後漢使往

來路至烏弋而止莫有至條支者章帝時國人來進

異瑞有鳥名鳩鵲形高七尺解人言和帝時班超遣

掾甘英使大秦抵條支臨大海欲渡不果乃還其後

條支故地爲波斯所據波斯者其波斯匿王乃大月氏別裔子孫以王父爲氏遂世爲國號前此未通至元魏神龜中其國遣使上書貢物云大國天子天之所生願日出處常爲漢中天子波斯國王居和多千萬敬拜朝廷嘉納之自此至梁隋俱遣使貢而隋亦遣使李昱至其國隋末西突厥葉護可汗討殘其國而不能有唐貞觀中獻水珠行軍乏水置土中水自出又獻活禱蛇狀類鼠色正青長八九寸能入穴取鼠是時條支遺種亦來朝貢獻金麥銀米各數十斛後波斯王爲大酋所逐大食復攻之遣使告難高宗以遠不可出師龍朔初又訛爲大食所侵時天子遣使到西域分置州縣以疾陵城爲波斯都督府拜其王爲都督俄爲大食所滅雖咸亨天寶乾元間遣使入貢然其地盡入大食不過臣屬大食而已大食王者其先亦波斯人也當隋大業中波斯國人牧於俱紛摩地那山有獸言曰山西三穴有利兵黑石而白文得之者王其人往果得石以爲瑞乃糾合其衆剽略貨貨聚徒浸盛遂自立爲王據有波斯國之西境地多砂石不堪耕種無五穀惟食駝象等肉後破波斯佛祿及南侵婆羅門諸國始有粟麥倉庾於是遂

強地廣萬里勝兵至四十萬康安等四五十國皆往
臣之其王嘗遣人乘船賫糧入海經涉八年未極西
岸於海中見一方石石上有樹枝赤葉青樹上總生
小兒長六七寸見人不語而笑手足皆動摘取入手
卽乾黑其使度糧乏難極西界遂還持一枝見王此
亦奇事也唐永徽初大食王徽密莫末賦復遣使者
朝貢自言王姓大食氏波斯國人得國凡三十四年
傳二世矣開元初復遣使獻馬鈿帶謁見不拜曰國
人止拜天無拜王也其俗日五拜天故云有司切責
之乃拜初大食族中有摩訶來者勇而智衆立爲王
闢地三千里號白衣大食傳十四世至末換殺兄伊
疾而自立羣下怨其忍也將討之狗衆曰助我者皆
黑衣俄而衆數萬卽殺末換求故王孫阿蒲羅拔爲
主更號黑衣大食遣使朝貢代宗取其兵平兩京者
是也宋乾德初僧行勤遊西域因賜其王書以招懷
之自是後終宋之世朝貢不絕貢物有棟香白龍腦
白沙糖白越諾薔薇水琉璃瓶象牙賓鐵紅絲古貝
五色襍花番錦乳香無名異膺膺龍鹽千年棗偏
狻五味子駝毛褥錦襪番花簞金飾壽帶連環臂鈎
等物宋帝賞賚輒準其所貢之直初入貢路繇沙州

涉夏國抵秦州後輒爲西人鈔掠乃詔自今取海路
繇廣州至京師政和中橫州士曹蔡蒙休押伴其使
入都汭道故滯留強市其香藥不償直事聞下詔獄
治詔自今蕃夷入貢並選承務郎以上清強官押伴
按程而行無故不得過一日乞取賈市者以自盜論
云我朝洪武初國王遣使貢馬及方物永樂初國
王宰奴里阿必丁遣使朝貢封爲蘇門答刺王賜印
誥金幣旣而國王與鄰國花面王戰敗死子幼有一
漁翁奮志領兵攻殺花面王遂妻故王妻自稱老王
而得其國遣使來貢無何故王之子長大陰與部目
謀殺漁翁復其故位而漁翁之嫡子蘇幹刺者逃居
鄰谷自立爲王率衆復父之仇會太監鄭和至其國
發兵擒獲蘇幹赴京伏誅王子感上德意貢方物
甚夥至今不絕其地大抵從泉州西北舟行順風大
約百日可抵其國田礮谷少男白布纏頭腰圍摺布
女椎髻腰圍色布手巾其酋長人修一日之間必三
變色或黑或赤或黃每歲必殺十餘人取血浴身云
四時不生疾疹故民皆畏服焉王居以瑪瑙爲柱綠
甘爲壁水晶爲瓦碌石爲磚活石爲灰帷幕之屬悉
百花錦官有丞相太尉馬高七尺士卒驍勇民居與

中土同技藝咸精番商往來其鄰有故臨國人黑如

漆好為寇盜中國人往大食者必自故臨易小舟而

去有默伽國其先荒野大食有祖師蒲羅呼徙居其

地取妻生子曰司麻烟生時以足蹙地清泉湧出項

之遂成大井後泛海遇風波者以此水洒之無不頓

止與天竺天方井同有那孤兒國即花面王國也國小僅比

大村獠頭裸體如獸類然人皆拳面故名其屬國有

勿斯里經八九十年始一見雨每二三年間必有老

飢疫良久復入水中其塔頂有神鏡若他國兵至則先照見

可採食之次年復生名麻吉慈尼地極寒春雪不消

茶澤三年再生名沒石子產雪蛆狀如瓠瓜

食之味美大治內熱麻離拔貴人以金線挑花帛黎伐國民僅

家語言動用與蘇門答刺纏頭市用金銀錢白達地多珍寶人食酥酪

同亦附蘇門答刺進貢其產美菜長六尺偏菴其形偏肉白布纏頭兵強

他國不敢侵犯其產美菜長六尺偏菴其形偏肉白布纏頭兵強

極大十人方石櫛重五斤臭果長八九寸開之甚臭內

可共取一枚酸子大如梨其蒲桃大如雞子竹雞略煮便熟味

甜美可食酸子大如梨其蒲桃大如雞子竹雞略煮便熟味

鳥高四尺足似駱駝名馬馬與龍胡羊尾大如扇春

數十斤以藥線縫合螺子黛寶也每顆龍涎香龍開

之羊如故不割則久齋薇水酒衣經歲為奇

論曰蘇門答刺王日變三色取血浴身此島夷志所

載也自條支既通波斯大食世貢中國前史未嘗紀

有談奇詭譎之事面色數更豈人類耶況俗奉浮屠
謹持五誠殺人取血冥業安在笈自古著禪史者非
假怪異不能膾炙人口惟是博覽之士無爲耳食則
可矣

咸賓錄西夷志卷之三

終

咸賓錄西夷志卷之四

明豫章羅曰聚尚之父著

于闐

于闐大國也去中國萬里張騫所窮河源一出于闐
者是也光武末爲莎車王所并後于闐王將休莫霸
者反莎車自立爲于闐王休莫霸次兄于廣德立復
滅莎車其國轉盛服從者十三國與鄯善並稱大國
焉元嘉時于闐將翰棘等殺漢長史王敬漢欲討之
不果于闐恃此遂驕晉太康中其國遣使貢古玉印
上命緘而藏之至後魏時祖瑩所辨卽此印也宋齊

未通後魏太武遣高涼王那討吐谷渾慕利延利延懼驅其部落渡流沙那軍急追之利延遂西入于闐殺其王次者甚衆顯祖末蠕蠕寇于闐于闐患之遣使素月伽上表請援公卿議于闐萬里蠕蠕性但野掠不能久頓攻城卽遣師勢無及矣詔以此議諭使者遂止不發兵也先是魏遣使者韓羊皮使波斯道經于闐于闐中于王秋仁輒畱之羊皮歸言狀魏復遣羊皮責諭之自是朝獻不絕矣梁武天監始通江左遣使貢方物頃之獻波羅娑步障獻琉璃鬘獻刻玉佛蓋終梁之世凡四人貢馬周達德初獻名馬隋

大業中頻遣使朝貢時其王姓王氏字卑示錦帽金裝冠髮不令人見俗云見王髮年必儉也唐時其王姓尉遲氏名屋密本臣突厥貞觀初遣使入獻後三年遣子入侍阿史倫杜尔之平龜茲也其王伏闕信大懼使子獻橐它三百長史薛萬備謂杜尔曰今破龜茲西域皆震恐願借輕騎羈於闐王獻京師杜尔許之至于闐陳唐威靈勸人見天子伏闕信乃隨使者來會高宗立授右衛大將軍賜賚特厚畱數月遣之請以子弟宿衛上元初身率子弟酋領七十人來朝從擊吐蕃有功唐以其地爲毗沙都督府授伏闕

信都督歿凡五傳而尉遲勝立至德初以兵赴難因請留宿衛唐以其弟葉護曜權知本國事項之進方圓二美玉徑各五寸光可鑑髮上以示道士言解言解曰此一龍玉一虎玉圓者龍也生於水中為龍所寶若投於水必有虹霓出焉方者虎也生於崑崙谷為虎所寶若以虎毛拂之即紫光迸逸百獸懾伏上令試之果驗詢問使者曰圓者得自漁人方者得自獵戶上因命藏之內府以後絕不復至矣及石晉時其王李聖天自稱唐之宗屬遣使貢紅鹽鬱金玉氎犖牛尾等物晉遣張鄴高居誨等入其國冊聖天為太

寶于闐國王七年乃還五代史載有居誨記皆往來所見山川而未及聖天世次也宋建隆初聖天遣使貢圭一以玉為匣玉枕一本國摩尼師貢琉璃瓶二胡錦一段後自乾德以至嘉祐間入貢者無慮數十遠不踰二歲近則一歲再至地產乳香來者輒負私與商賈牟利不售則歸諸外府得善價故其來益多故元豐初詔于闐唯賫表及方物馬驢乃聽詣闕乳香以無用不許貢也元祐中以其使至無常令熙河間歲一聽至闕紹聖中游師雄言于闐大食拂菻等國貢奉般次踵至有司憚於供賚抑留邊方限二歲

一進此非所以來遠人也從之自是訖於宣和朝貢不絕先是太平興國中有澶州卒王貴者晝忽見使者至營急召貴偕行南至河橋驛馬已具卽乘之俄覺騰空而去頃之駐馬但覺室宇宏麗使者引貴入見其主容衛制度悉如王者謂貴曰汝年五十八當往于闐國北通聖山取一異寶以奉皇帝宜深志之遂復乘馬凌空而旋軍中失貴已數日矣驗所乘卽營卒之馬也知州宋煦劾貴以聞太宗釋之天禧初貴自陳年已五十八願遵前戒西至于闐詔許之貴至秦州忽遇一道士引貴登高原令貴閉目頃復令

開視山川頓異道士曰此于闐北境通聖山也復引貴觀池中有仙童出一物授之謂曰持此奉皇帝又令閉目少頃復至秦州向之道士已失所在矣發其物乃玉印也文曰國王趙萬永寶州貴歸以獻元時內屬丞相伯顏至其國鑿井得一玉佛色如截肪照之皆見筋骨脈絡如生佛然此皆一奇事也我朝永樂二年頭目打魯哇亦不刺金遣使貢玉璞十二年吏部陳誠至其國國王微弱鄰國交侵避居山谷永樂以後西戎奉貢不相侵伐始得安息富饒桑麻禾黍宛如中土土人機巧好歌舞紡績俗尚浮屠僧

尼尤多雖國王亦輒持三戒相見輒跪稍知禮節尊卑凡人死者以火化之收骨共葬一塔各以長幼為序以沙為冢居喪者剪髮長四寸云佛見雁死於地以沙葬之胡人稱為雁塔後佛涅槃循其故事亦以沙葬而立塔焉自高昌以西諸國人皆深目高鼻惟于闐貌不甚胡頗似華夏河源至于闐分為三河曰白玉河黑玉河綠玉河皆出玉而色異每歲秋水涸國主澆玉於河國人始得澆玉其山川古蹟葱嶺贊摩寺即昔羅漢比丘比盧彌為其王造覆盆浮圖之所石上有碑支佛跡處雙足猶存比摩寺是老子化胡成佛之所其產蒲菴酒胡錦花苴布以花苴織成者砂

積鼠膺臍臍見前芸輝香草也色白如玉入土不朽唐元載碎之以塗壁號芸輝堂

五色玉為異

論曰太史公云禹本紀言河出崑崙今自張騫使大

夏之後也窮河源惡睹所謂崑崙山者乎蓋以証河

出崑崙之謬也後儒不達遂神其論謂崑崙或言此崑崙非

今大環以弱水之深甘州西北四十里有水環合黎山謂之弱水禹貢導弱水至於

合黎即此諸書所載者弱水必非此水無疑繞以炎火之山去中國四十

萬里是惟帝之下都神物生焉聖人神仙集焉其

金城玉樓碧堂瓊室西王母之所治也其虛談詭論

不可勝紀蓋自山海經崑崙崑崙有神人面虎身之說起

云惟莫辨崑崙故河源歷代難究至元始祖使篤實
西窮河源始知其出於星宿海星宿海者在吐蕃朶
甘思之南地近百泓匯而爲澤登高望之若星宿然
直中國四川馬湖府之正西三千餘里雲南麗江府
之西北一千五百里自西而東合諸河水其流漸大
行二十餘日至大雪山卽所謂崑崙山也繞山西南
折而東而北而西又繞崑崙之北又轉而東北二十
餘日歷雲中九原至大寧始入中國道今以禹貢參
考絳象河圖及河源志一一皆合然則河水經崑崙
山非河源出崑崙山也太史公辨之當矣況其山亦
曷嘗異哉彼不深究河源而誕稱崑崙以愚聾瞽著
言何爲徒用汚殺青矣

默德那

默德那卽回回祖國也宣德中遣人隨天方來貢初
國王謨罕驀德生而神靈臣服西域諸國尊爲別諸
援爾華言天聖也國中有佛經三十藏書兼篆艸楷
隋開皇中國人撒哈八撒阿的幹葛始傳其教入中
國其地接天方城池宮室田園市肆大類江淮間寒
暑應候地宜五谷亦有陰陽星曆醫藥音樂諸技藝
人不食豕肉諸非同類殺不食織文彫鏤器皿極精

巧土產猫睛祖母綠獅子梭甫撒哈刺西洋布押不

廬藥名人少飲即死乃斧不火失刺把都藥也形如木鼈子而

小可治一百二十種疾為奇

天方

天方古筠冲地一名天堂宣德五年太監鄭和等往各番國到古里差使諭天方國王王即遣使來貢方物并畫天堂圖以獻其地風景融四時皆春田沃稻饒居民安業人以馬乳拌飯故多肥美俗好善無科擾於民故無貧難無盜賊故自然淳化乃極樂之界也國內有禮拜寺寺分為四方方各九十間皆白玉

為柱黃玉為地地中有黑石一片方丈餘云漢初天降也遍寺墻壁皆薔薇露龍涎香和水為之馨香不絕上用皂紵絲為蓋罩之畜二黑獅子守其中門每歲十二月十日各番回回人雖萬里之外亦來禮拜皆將所罩紵絲割取一方為記而去割盡復換年年不絕貨物甚多日中不市至日落之後方為夜市益

其日色極熱故也其山川古蹟驀底城內有前國王墓墓頂日夜

放光侵雲而起墓後一井名其產珍寶獅豹名馬高

阿必糝水可止風與聖水同駝雞羚羊艸上飛俱詳後纏花樹其花一年二為奇

祖法兒

祖法兒漢之大夏隋唐之吐火羅是也昔漢張騫至
大夏言其俗土著無大君長兵弱畏戰善賈市其都
曰藍市城及匈奴擊破大月氏王以王頭爲飲器其
種人遂收餘衆過宛西擊大夏而臣之大夏遂臣屬
月氏矣至隋唐時名吐火羅世次難考與噉噉雜居
勝兵十萬噉噉者大月氏之遺種也大業中遣使朝
貢唐初屬西突厥然武德貞觀中俱入獻也高宗時
獻大鳥高七尺色黑足類駱駝人可乘鼓翅而行三
百里能噉鐵俗謂駝鳥顯慶中以其阿緩城爲月氏
都督府析小城爲二十四州授王阿史那爲都督未
幾遣子入朝畱宿衛俄又貢瑪瑙鐙樹高三尺開元
天寶間數獻馬騶異藥乾阿陀婆羅二百品紅碧玻
璃乃冊其君骨咄祿頓達度爲吐火羅葉挹怛王其
後鄰胡羯師謀引吐蕃攻吐火羅於是葉護失里忙
伽羅巧安西兵助討帝爲出師破之乾元初與西域
九國發兵爲天子討賊肅宗詔隸朔方行營宋時未
通我朝永樂宣德中王亞里俱遣使朝貢國無城
郭俗朴實尚回回教王以白細番布纏頭身穿青花
細紬絹或金錦衣袍出入乘轎跨馬前後陳列象駝
鼓吹氣候常熱市用金銀錢文如人形男拳髮穿長

衫女則以布兜頭面出見人亦不出露男多女少故
 兄弟通室婦人五夫則首戴五角十夫戴十角無兄
 弟者與他人結為昆季然後得妻生子屬其長兄其
 民如遇禮拜寺日必先沐浴用薔薇露或沈香油塗
 其面更以新衣復以沈檀掩八兒香熏其衣體始往
 禮拜是日經過街市香氣旬日不散其山川則頗黎
 山有穴產神駒皆汗血其產福鹿周身俱白中有細青花如画者駝雞即駝鳥也中有
肉鞍可乘夷人名馬穴中產為奇
殺之以賣其肉

覽邦

覽邦漢踈勒國也明帝永平中龜茲王建攻殺踈勒

王成自以龜茲左候兜題為踈勒王漢遣班超劫縛
 兜題立成之兄子忠為踈勒王忠後叛反超擊斬之
 耿恭為戊巳校尉屯車師後王金滿城為匈奴所攻
 恭引眾入踈勒城中乏水穿井十五丈不得水恭整
 衣冠向井拜拔刀刺山飛泉涌出賊遂退安帝元初
 中踈勒王安國歿舅臣盤立為王日以強盛數遣使
 貢獻靈帝建寧初為季父和得所殺自立為王其後
 連相殺害漢不能復禁至後魏文成末其王遣使送
 釋迦牟尼佛袈裟一長二丈餘帝以其審是佛衣當
 有靈異命焚之置猛火上終日不燃其王戴金獅子

冠每歲嘗供送於突厥其都城方五里國內有大城
十二小城數十人手足皆六指產子非六指者卽不
育勝兵有二千人地多沙磧少壤土俗尚詭詐生子
亦束頭取福其人文身碧瞳王姓裴氏自號阿摩支
居迦師城突厥以女妻之隋大業中又遣使來唐貞
觀初遣使者獻名馬太宗謂房玄齡等曰曩之一天
下克勝四夷惟秦皇漢武耳朕提三尺劍定四海遠
夷率服不減二君者然彼末路不自保公等宜相輔
弼毋進諛言置朕於危亾也儀鳳時吐蕃破其國開
元中遣大理正喬夢松攝鴻臚少卿冊其君安定爲
疏勒王天寶十二年首領裴國良來朝授折衝都尉
賜紫袍金魚宋時未通我朝洪武九年國王昔里
馬哈刺扎來貢永宣間輒附鄰國貢方物地多沙磧
谷惟麻麥產無奇

哈烈

哈烈大國昔漢之大宛元魏之洛鄯隋之蘇對沙那
及石國皆其地也昔漢武帝欲伐匈奴聞月氏與匈
奴有隙欲通使月氏并力共滅之乃募能使者張騫
以郎應募往月氏道經匈奴爲單于所得留十餘歲
與妻有子後與其屬亾鄉月氏西徙數日至大宛大

宛聞漢饒財乃遣使導送至月氏踰二年張騫還漢具爲武帝言大宛城郭兵衆及汗血馬其先天馬子也帝聞宛多善馬卽遣使者持千金往宛以請宛善馬宛王以漢絕遠大兵不能致遂殺漢使泰初元年拜李廣利爲貳師將軍期至貳師取善馬率數萬人至其境攻郁城不下引還往來二歲至燉煌士卒存者十不過一二帝怒其不克使遮玉門不許入貳師因留屯燉煌又遣貳師率六萬人負私從者不與馬牛十萬馬三萬匹驢橐駝萬數天下騷然益發戍甲卒十八萬置居延休屠以衛酒泉貳師至宛宛人斬

王母寡首獻馬漢軍取其善馬數十匹中馬以下牝牡三千匹而立宛貴人昧蔡爲王約歲獻馬遂採蒲萄苜蓿種而歸貳師再行往返凡四歲後漢明帝時宛獻汗血馬後魏洛陽國數獻馬隋時名蘇對沙那國其王姓蘇色匿字底失盤佗而其北鄙爲石國亦故大宛地隋大業初遣使朝貢唐武德貞觀間數獻方物顯慶三年以瞰羯城爲大宛都督府授其王都督開元初封其君長爲石國王頃之其王上言今突厥已屬天可汗惟大食爲諸國患請討之天子不許天寶初封王子那俱車鼻施爲懷化王賜鐵券久之

安西節度使高仙芝劾其無藩臣禮請討之王約降
仙芝遣使者護送至開遠門斬闕下於是西域皆怨
王子悉大食乞兵攻怛邏斯城敗仙芝軍自是臣大
食寶應時遣使朝貢前史載其俗以蒲萄爲酒富人
藏酒至萬餘石久者至數十年不敗其良馬有肉角
數寸或有解人語及知音舞與鼓節相應者國城之
東南立屋置座於中正月六日七月十五日以王父
母燒餘之骨金甕盛之置于床上巡繞而行散以香
花襍果王率臣下設祭馬禮終王與夫人出就別帳
臣下以次列坐而饗宴宋時未通元時內屬我朝

名哈烈一名黑魯元附馬帖木兒之子沙哈魯居其
地國人稱爲速魯壇猶華言君王也洪武二十五年
遣使詔諭永樂七年頭目麼賚等朝貢吏部陳誠曾
至其國正統二年指揮哈只等貢馬玉石其地城方
十里居平川川廣百里四面大山王居東北山壘石
爲屋屋若高臺無棟梁墻壁窗牖皆金碧琉璃門扉
彫刻嵌骨角屋傍設綵綉帳房爲燕寢所金牀重裊
民土房或氊帳以兩少故上下相與直呼名雖王亦
然相見稍屈躬道撒力馬力一語握手或相抱爲禮
致意於人則云撒盤少炊爨飯食就肆無匕箸無正

朔時日年月男髡首衣尚白及喪反易青黑或無棺
槨人多善走日行三百里氣候常熱磁器及紈綺甚
精巧過中國田多收穫宴會豐厚男女瀆亂無耻大
抵西域城郭諸國哈烈俗最鄙陋然有學舍生徒講
習經義好施予務農桑則又諸國所不及也隸國則
有俺都准八刺黑二國俱平曠無險地沃人繁物產有鎖伏花毯
獅子水晶鹽酒杯藤花堅明可愛國人人用以酌酒實如豆寇香美銷酒為奇
古里以下俱西域小國無世系事跡可考第以其朝貢中國故詳錄之
古里乃西洋諸番之會去中國十萬里永樂元年王
沙米的遣人朝貢五年遣太監鄭和賜王誥幣封為

國王陞賞其將領有差王好浮屠族類分五種燬牛
糞為囊佩之或塗肢體其穢俗也尚信義行者讓路
道不拾遺其美俗也海濱為市通諸番國事皆決於
二將領國人亦有南昆回回哲地革全木瓜五等與
三佛齊同南昆為王不食牛回回為將領不食猪各
從其俗其國王或傳子而傳甥無甥則傳弟其辨
盜真偽辨訟曲直亦以手置沸油中試之算法以手
足二十指會計毫髮無差其產小瓜大如小指長蝠其大如鷹常于木齧黃牛人不食其肉或則為奇
子樹上倒挂而歇

溜山

溜山一名牒幹小國也洪武初國王遣人朝貢其地
 無城郭倚山聚居風俗淳美尚佛業漁男女體貌微
 黑男子白布纏頭下圍以悅婦人上穿短衣以悅圍
 頭止露其面以銀為錢或用海貳其西有天生石門
 如城闕然中有八溜各有所主廣三千里云所謂弱
 水三千是也其人巢居穴處不識穀帛但食魚蝦以
 樹葉遮其前後為衣商船倘遇逆風舟師不謹落入
 其溜其水漸無力而沈不復反矣溜山物產甚多惟
 龍涎香見前鮫魚一名溜魚切塊淡乾賣與他國絲嵌手巾細密絕勝他處織
 金手帕絕精富家男子以之纏頭每幅價可值銀五兩為奇

阿丹

阿丹小國也永樂九年遣太監鄭和諭之賜命互市
 其王拜 詔待使禮俱甚恭隨遣使進金相寶帶金
 冠鴉鶻諸寶石蛇角等物地近古里其俗國王金冠
 黃袍腰繫寶帶至禮佛則易細番布纏頭上加錦頂
 身服白袍其頭目冠服各有差男女服飾悉如溜山
 屋皆石壘交易有赤金錢紅銅錢以十二月為一歲
 歲亦無閏每夜見新月即一月也其四時惟以花木
 榮謝定之自有推算毫髮無差國有馬步兵七八千
 鄰國畏之其產珊瑚樹薔薇露萬年棗大尾羊獅子

麒麟福鹿駝雞白雉寶石

以上物產俱各見前

為奇

南巫里

南巫里小國也洪武初遣使貢降真香等物其地自蘇門答刺西風一日夜可至國民千餘家皆回回人王服飾略同阿丹宮室用大木高三四丈如樓樓上甚潔聽政寢食皆在其中下則畜牛羊等物矣民俗與蘇門答刺略同其山川帽山山下二三十餘谷自稱王屬南巫里其產降真香惟此國者為佳黑珊瑚大如拊指其色如墨其潤如玉有極枝婆娑可愛為奇

白松虎兒

白松虎兒舊名速麻里兒先時有白虎出松林中遇獸不食遇人不傷旬月餘不見父老云此西方白虎降精故更今名永樂中遣使十六人來貢山川古蹟物產無奇

阿速

阿速西海中為稍大國也永樂中遣使百十二人朝貢其地多撒馬兒罕天方諸國人俗敬佛惡鬪涼暄適節人無饑寒夜無寇盜物產無奇

乞力麻兒

乞力麻兒永樂中遣使十二人朝貢其國山卑水淺

西南傍海東北林莽深密多猛獸毒蟲民不事耕稼
喜射獵物產無奇

牒幹

牒幹在西海中永樂中國王亦速福遣使朝貢其地
居皆回回人俗淳厚氣候常熱市用銀錢產龍涎香
鮫魚織絲織金悅甚精

黑葛達

黑葛達小國也宣德中遣人朝貢其地土瘠民貧尚
佛畏刑山川物產無奇

黑婁

黑婁小國也宣德七年朝貢其地近土魯番世相結
好山川禽獸皆黑男女亦然故名

哈失哈力

哈失哈力一名阿力馬力宣德中來貢

呵哇

呵哇永樂中王昌吉刺遣使朝貢

麻林

麻林未詳其國所在永樂十三年王遣使貢麒麟厚
賜之

加異勒

加異勒小國也永樂宣德間俱遣使朝貢其地民貧
常備鄰國物產無奇

敏真誠

敏真誠國稍大永樂中遣四十人朝貢俗日中爲市
其產異香等物

八答黑商

八答黑商永樂間遣四十人貢織皮絨麝香木其國
山川明秀俗尚佛西洋西域皆商販於此產無甚奇
火刺札
火刺札國弱產微四圍皆山山少艸木水無魚蝦俗

尚佛永樂中遣使朝貢

蘇文達那

蘇文達那洪武十四年國王殊旦麻勒兀達盼遣使
來貢或云卽蘇門答刺非也

失刺思

失刺思永樂間來貢時遣內外官以綺幣磁器市馬
於撒馬兒罕失刺思諸國宣德中復朝貢

納失者罕

納失者罕永樂中遣使朝貢其地去失刺思數日程
皆舟行海中國饒水艸故產馬多俗敬僧喜鬪物產

無可

瑣里

瑣里小國也洪武五年國王卜納的遣馬牙茶嘉兒幹的亦刺丹八兒奉金字表來朝貢方物并上其土地山川圖 詔優禮之賜大統曆金幣等物永樂元年復遣使朝貢俗同西域其地近西洋瑣里執力微弱西洋瑣里輒侵辱之物產甚微惟有撒哈刺諸布其貢物雖有珍異然皆自鄰國貿易來者非本國所產也

西洋瑣里

西洋瑣里比瑣里為差大洪武三年遣使以金葉表朝貢賜遇甚厚永樂元年來貢 上令勿征其番貨二十九年西洋十六國遣使一千二百人貢方物至京師西洋瑣里貢獨豐美其產惟布為佳

論曰西夷諸國或在嘉峪關外或居西海島中限以沙礫阻以風濤殆天所以隔絕華夷也乃有漢武隋煬好大之主張騫裴矩喜事之臣一言相契如水投石遂致越海板山遣使絕域來則賄結逆則兵臨於是流沙以西弱水以東莫不獻奇納質凡珠玉錦罽珍果異香之屬充於後宮獅象駝駿猛獒火雞之羣

實於外圍貢環之盛古罕聞焉然而賂遺師旅供億
莫貲一人未享其奉萬姓先罹其毒用是漢遂虛耗
而隋祚亦斬焉豈非作無益以害有益之明監乎唐
太宗英武蓋世威服諸夷卒之吐蕃作逆四鎮失守
西夷亦自此輕唐矣宋朝微弱封域以內且不能保
卽遠人有貪賄而來者曷足爲宋重也元雖列置郡
縣徒虛名爾惟我 皇朝文命誕敷西戎卽序日月
所入罔不率俾朝貢之國無慮百餘旣無設官立鎮
之勞又無興師遣使之費如祖法兒以下諸夷多有
自古未通者試與前代較德量力豈可同日語耶書
曰無有遠邇畢獻方物又曰不寶異物則遠人格其
殆今日之謂矣

威賓錄西夷志卷之四 終



